

JNUHUN VAHA NI TEE SAN JUAN

Yaā naní Jnúhun Yaā Dios ni nduu ya tēe

¹ Nde xihna ñúhún ná ni jecōo ndihí jeē iyó, te je iyó Yaā naní Jnúhun Yaā Dios, chí steén yā ndihí jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya. ² Máá yá ndeé yá nde jeē xihna ñúhún jíin Yaā Dios. ³ Te ní sáha Yaā Dios jeē jíin máá yá ní jecōo ndihí tāca jēe iyó. Te ma jécōo ní ñin jeē iyó núu tu ní sáha máá yá. ⁴ Máá yá sáha jeē técu ndihí-ni, te máá yá cúu luz jeē steén ini anuá ñayuu, cúu jeē sáha ya jeē jécúhun ní i síquī Yaā Dios. ⁵ Te Yaā cúu luz ún ndíndēe núu ñayuu tu cájica ndaā, jeē nájnūhun cáhīyo i nuū nēe. Te ñayuu cáhīyo nuū nēe tu cúu ndahva i luz yā.

⁶ Te ní Iyo ñin tēe jeē ní tají Yaā Dios, naní de Juan. ⁷ Tēe un ní quiji de jeē nácani cájī de jnúhun máá Yaā cúu luz, návāha candíje tāca ñayuu jeē jíin jnúhun cáhán de. ⁸ Nasūu máá Juan cúu luz ún, chí cúu de ñin jeē ní nacani cájī jnúhun máá luz un. ⁹ Te máá Yaā cúu luz ndije jeē steén ini anuá tāca ñayuu, nde saá ní quiji ya ini ñayīví.

¹⁰ Te Yaā cúu Jnúhun Yaā Dios ní condee yā ini ñayīví, te vēsú jeē jíin máá yá ní sáha Yaā Dios ñayīví, te ñayuu ñayīví tu ní cácuni i cuatáhú i jeē máá yá cúu. ¹¹ Ní quiji ya nuū ñayuu máá yá nación hebreo, te ñayuu ún tu ní cájetáhú i ya. ¹² Te vēsú súcuan te sava ñayuu chí ní cajetáhú i ya, te ní cacandíje i jeē sáha ya jehē i. Te nuū máá i ní jēhe

ya jnūhun jeē ndúu i sēhe Yaā Dios. ¹³ Te jeē ndúu i sēhe Yaā Dios, nasūu jíin modo jeē cácacu ñayuu ini ñayīví, ni nasūu síquī jeē cáacuni tēe, chi máá Yaā Dios sáha ya jeē ndúu i sēhe ya.

¹⁴ Te máá Yaā cúu Jnūhun Yaā Dios ni nduu ya tēe, te ni condee yā jíin yó. Te ni cajito yó jéē yóhyo luu cújéhnū ya, chi máñúhún-ni ya cúu Sēhe Tátá yā, Yaā cújéhnū súcuan. Te máni máá jéē sáha ya jeē váha yóhó, te máni máá jnūhun ndaā cahán yā. ¹⁵ Te Juan ni nacani de jnūhun ya, te ni cahán de:

Yaā yáha cúu jeē ni cahán rī náa áchí rí jeē Yaā quiji chi cújéhnū ga yā vēsú ruhū, chi je iyó yá nde ná tu cacu rí, achí de.

¹⁶ Te ndihí yó ní canihīn yō cuehē ndasí jeē váha iyó núu yā, chi máni jeē váha sáha sáha ya jíin yó. ¹⁷ Moisés ni steén de ley Yaā Dios nuū ñáyuu jenahán, te Jesucristo chi sáha ya jeē váha yóhó te stéén yā tāca jnūhun ndaā Yaā Dios nuū yō. ¹⁸ Tú ni ñn ñayuu ni jíto cuiti nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yō ndese Yaā cúu Yaā Dios.

*Jnūhun Jesús jeē ni cahán Juan tēe scuándute
(Mt. 3.11-12; Mr. 1.7-8; Lc. 3.15-17)*

¹⁹ Te ñayuu hebreo ñuu Jerusalén, ni catajī i jecu sutū jíin tēe grupo levita jeē cácejnīñu ini templo, ni jengoo de nuū Juan, návāha cajnūhún de ndé ñn cúu Juan te na jniñu ndíso de. ²⁰ Te Juan cájī ní cachí de:

Nasūu rúhū cúu Cristo, achí de.

²¹ Te ni cacajnūhún tucu de:

Núu súcuan ¿te ndé ñn cúu ró? ¿A cúu ró Elías, tēe ni nacani jnūhun Yaā Dios nde jenahán, chí naún?

Te ni cahān Juan:

Nasūú de cúu ri.

Te ni cacajnūhún tucu de:

Núu súcuan ¿te á cúu ró tée nacani jnūhun Yaā Dios jeē achí tutu īī jeē quíji?

Tuú, achí tucu Juan.

²² Te ni cacahān tucu jíin de:

¿Te ndé ĩn cúu ró núu súcuan? Cachi nuū rī jijnáhan ri, chí jíin ñūhún castūhun rí nuū tāca tée ni catají rúhū vējicoo ri. Cachi na jniñu ndíso ró víi.

²³ Te ni cahān Juan:

Máá rí cúu tēe jeē ni cáhān Isaías, tēe ni nacani jnūhun Yaā Dios nde jenahán, jeē quíji ri cana jee ri nde nuū ñūhun téhé. Te cáhān rī jíin ñáyuu jeē na sátūhva i máá i, chí quiji máá Jítóho yō. Achí Juan.

²⁴ Te tēe grupo fariseo cácuu jeē ní catají tée ni quijicoo ún. ²⁵ Te ni cacajnūhún de Juan:

Núu súcuan ¿te naun scuándute ró te núu nasūu Cristo ni Elías ni máá tée quiji nacani jnūhun Yaā Dios cúu ró?

²⁶ Te ni cahān Juan:

Ruhū chí jíin ndute scuándute ri. Te mēhñu ró jijnáhan ró íne ĩn Yaā jeē tu cájini rō. ²⁷ Te Yaā un cúu jeē ni cáhān rī jeē quíji ya te cújéhnú ga yā vēsú ruhū. Chí tú na vé jéhnú cuiti cúu ri nuū yā, ni jeē cuajníñu ri nuū yā vēsú ĩn jniñu lúli gá nájñūhun jeē ndají rí correa ndijēn yā. Achí de.

²⁸ Súcuan ni cuu jeē ní candajnūhún de jíin Juan nde Betábara jeē íne ichi núu cáne niāndii yūte Jordán, nuū scuándute Juan.

Siquī jeē cúu ya Londe Yaā Dios

²⁹ Te inga quivī un ní jito Juan nuū Jesús jeē véji ya nuū de. Te ni cahān de jín ñáyuu:

Condēhe jijnáhan ró, chi yāha véji Yaā cúu Londe jeē ní tají Yaā Dios, te cuu yā jeē sándoo ya cuēchi ñayuu ñayīví. ³⁰ Yaā yāha cúu jeē ni cáhān rī jeē quíji ñn Yaā kujéhnū ndasí, chi je íyó yá nde ná tu cacu ri. ³¹ Te nde saá te tu ní jíní rī jeē yāha cúu Yaā ní tají Yaā Dios. Te ni quíji ri jeē scuándute ri ñayuu ñuu yō Israel jín ndute, návāha stéén rī nuū i jeē suu ya cúu, áchí Juan.

³² Te suni ni cahān gā de jnūhun ya:

Ni jito ri Espíritu Santo, ni cuun ya ichi ándiví, cáa ya nájnūhun paloma, te ni quee ya xinī Jesús. ³³ Te nde saá te ná tu cuni rī jeē Jesús cúu. Te máá Yaā Dios jeē ní tají yá ruhū jeē scuándute ri jín ndute, ni cahān yā jín rí: Núu ni jito ró jēé cúun Espíritu Santo te quendōo xinī ñn tēe, yūcuan cúu Yaā jeē cuáha Espíritu Santo condee ini anuá ñayuu, achí Yaā Dios. ³⁴ Te je ni jito ri ún, te nácani cájí rí jnūhun jeē maá yá cúu Sēhe Yaā Dios. Achí Juan.

Uū tēe jeē ní cana ya xīhna gā

³⁵ Te inga quivī ún te Juan íne tucu de yūcuan jín uū tēe cájica jín de. ³⁶ Te ni jito de nuū Jesús jeē jíca ya yūcuán. Te ni cahān de:

Condēhe jijnáhan ró, chi yūcuan cúu Yaā cúu Londe jeē ní tají Yaā Dios.

³⁷ Te ndindúú tēe cájica jín Juan ni cajini sōho de jnūhun yāha, te ni candiquīn de Jesús. ³⁸ Te ni ndió cóto Jesús, te ni jito ya jeē cándiquīn de yatā yā. Te ni cahān yā jín de:

¿Na vé cánanducú ró?

Te ni cacahān de jín yá:

Maestro, ¿nde nuū ndeé ní?

³⁹ Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jíin yá quivī ún, chi nájnūhun cacuūn jehíni cúu.

⁴⁰ Te Andrés, ñani Simón Pedro, cúu iin jeē ndindúú tée un jeē ní cajini sōho jnūhun ni cahān Juan, te ni candiquīn Jesús. ⁴¹ Te Andrés, yachī ni jenanducú de ñani de Simón, te ni cahān de jíin:

Ni caquijnáhan ri jíin Mesías, achí de. Te jnūhun un cúní cahān Cristo, Yaā ní tají Yaā Dios.

⁴² Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jnūhun un cúní cahān Pedro, jeē cuní cahān yuū.

Jeē ní cana ya Felipe jíin Natanael

⁴³ Te inga quivī un cúní Jesús quihīn yā región Galilea. Te ni nihīn jnáhan ya jíin Felipe, te ni cahān yā jíin de:

Condiquīn ruhū na quihín yō.

⁴⁴ Te Felipe cúu tēe ñuu Betsaida, jeē cúu ñuu Andrés jíin Pedro. ⁴⁵ Te ni jenanducú de Natanael, te ni cahān de jíin:

Ni canihīn jnáhan ri jíin Yaā jeē yosó jnúhun ya nuū tútu ley jeē ní tee Moisés, jíin núu tútu ni catee tēe ni canacani jnūhun Yaā Dios nde jenahán. Te Jesús sēhe José ñuu Nazaret cúu ya. Achí de.

⁴⁶ Te ni cahān Natanael jíin de:

¿Te ndese cúu cujéhnū ñn tēe jeē ní cacu ñuu ndahú Nazaret?

Te ni cahān Felipe:

Quíhín yō de cuni rō, achí de.

⁴⁷ Te ni jito Jesús jeē véji Natanael, te ni cahān yā:

Yāha véji ñn tēe ndaā jeē cúu ndije yucūn Israel, chí tu stáhú cuiti de, achí yá.

⁴⁸ Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē nundéhe higo, achí yá.

⁴⁹ Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

⁵⁰ Te ni cahān Jesús:

¿A máá jēē ni cáhān rī jeē ní jito ri rohó ná íne ró jéhē nundéhe higo, te jeē yúcuan cándíje ró rúhū naún? Tuú chí coo jniñu jéhnū ga coto ró vēsú jeē yáha, achí yá jíin de.

⁵¹ Te ni cahān gā yā:

Jendaá cahān rī jíin ró jíinahan ró jēē nde vijna te coto ró jēē núne andiví, te tēcá ndajéhé Yaā Dios cándaa cánuu nuū ruhū, Yaā ní nduu tēe, achí yá.

Jeē ni jéhēn yā ñn vico nándāha ñuu Caná

2

¹ Te ni yāha unī quivī, te ni íyo ñn vico nándāha ñuu Caná ndañū Galilea. Te yūcuan íne náná Jesús.

² Te suni ni cacana i Jesús jíin tēe cáscuáha jíin yá, ni jehēn yā vico un jíin de. ³ Te ni ndoco vino. Te náná Jesús ni cahān ña jíin yá:

Ni ndoco vino i, áchí ña.

⁴Te ni cahān Jesús jíin ña:

¿Naun cáhán ni súcuan jíin ná nánā? Chi ná tu quee quivī jeē sáha ná jniñu jéhnū, áchí yá.

⁵Te náná yā chi ni cahān ña jíin ñáyuu cájeni cohō:

Sáha ró jíináhan ró táca jéē cahān yā jíin ró. Achí ña.

⁶Te yūcuan íyó íñū tenéjā yuū jeē ñúhun ndute cájichi ñáyuu hebreo jeē ndúndoo i nuū Yaā Dios. Te ñin ñin tenéjā un cánda cuhun cuñ xico chí ciento litro ndute. ⁷Te ni cahān Jesús jíin ñáyuu cájeni cohō:

Scútú ndñ rō tācá tenéjā yáha.

Te ni cascútú ndñ i. ⁸Te ni cahān yā jíin i:

Vijna te quēen ró jecu te quindecá ró coto ndee tēe ndíto vico, áchí yá.

Te ni cajendeca i nuū de. ⁹Te ni séyūhú de ndute jeē ní nduu vino, te tu jíiní de ndé ní canihīn i. Chi máni mozo un cúu jeē cájini, chi máá i ni caquēen ndute ún. Yūcuán na te tēe ndíto vico ni cana de tēe nándāha. ¹⁰Te ni cahān de jíin:

Tāca ñáyuu chi xīhna gā vino váha cájēhe i, te núu je ni cajihī vāha ñáyuu cáhīn vico, yūcuán na te jéhe de vino ndahú na. Te máá ró tucu ni sáha ró, chi nde jeē sándñí te jéhe ró vino jeē yóhoyo vāha ga jíhi, áchí de.

¹¹Jniñu yáha jéē ni sáha Jesús ini ñuu Caná ndañúū Galilea cúu jniñu jéhnū xīhna ñúhún jéē ni sáha ya jeē steén yā poder yā. Te súcuan ni steén yā jeē yóhoyo cújéhnū ya. Te tēe cáscuáha jíin yá ni cacandíje de ya.

¹² Te ná ni yāha jniñu yáha, te cuahān yā ñuu Capernaum jiín náná yā jiín táca ñani yā jiín téé cáscuáha jiín yá. Te ni coyūcu yá yūcuán jecu quiṽī.

Jeē ní quenehen ya ñayuu ini templo
(Mt. 21.12-13; Mr. 11.15-18; Lc. 19.45-46)

¹³ Te jeē cuácuyajni vico pascua casáha jnáhan ñuu yā hebreo, te cuahān yā ñuu Jerusalén. ¹⁴ Te ini templo cáhnu ni jito ya ñayuu cáxícó stíquī jiín lanchi jiín paloma, jiín ñáyuu castáyī xūhun, cáyūcú i nuū mesa i. ¹⁵ Te jeē súcuan ni jito ya, te ni sáha ya ñn cuarta ññ. Te ni scúnu ya tǎcá i ini templo, nde jiín lanchi jiín stíquī i. Te ni jete yā xūhun ñáyuu castáyī. Te ni scotúú yá táca mesa i. ¹⁶ Te ni cahān yā jiín ñáyuu cáxícó paloma:

Tava tǎcá quiṽī yáha. Te ma sáha ró yáhu ini vehe Tátá rī. Achí yá.

¹⁷ Yūcuán na te tēe cáscuáha jiín yá, ni canucūhun ni de jnūhun yósó núū tútu iī: Je yajni cuu na jéē yóhyo ndíhvī ni na síquī vehe ní, achí yá jiín Tátá yā, achí tutu.

¹⁸ Te tēe ñuu yā hebreo ni cacajnūhún de ya:

¿Na jniñu jéhnú sáha ró jéē steén rō poder rō, te cucáhnu ni rī jeē ndíso jniñu ró sáha ró súcuan? achí de jiín yá.

¹⁹ Te ni cahān yatá Jesús:

Canu rō templo yáha, te nuū uní quiṽī te nucondichi sáha rī, achí yá.

²⁰ Yūcuán na te ni cacahān tēe hebreo un:

Uū xico iñū cuiyā te ni jīnu ni cuvāha templo yáha. Te róhó, ¿á núū uní-ni quiṽī te nucondichi sáha ró naún? Achí de.

²¹ Te templo jeē cahán Jesús cúu máá yiqui cúñu yā, chi cahni ñayuu yā te natecu yā nuū uní quivī.
²² Jeē yúcuán cúu jeē ná ni natecu yā jeē ni jíhī yā, te tēe cáscuáha jíín yá ni canucūhun ni de jeē ni cáhān yā jnūhun yáha. Te ni cacandíje de jnūhun jeē yosó núu tútu īi, jíín jnūhun yáha jēē ni cáhān Jesús.

Jeē jíní Jesús ndese cáa ini anuá ñayuu

²³ Te ná íne Jesús ñuu Jerusalén máá vico pascua, te cuehē ñayuu ni cacandíje i jeē cúu ya Cristo, chi ni cajito i tācá jniñu jéhnú sáha ya jeē steén yā poder yā. ²⁴ Te máá Jesús chi tu ní jétáhú yá i, chi je jííní yā ndese cáa ini anuá i jíínáhan i. ²⁵ Te tu jííní ñúhún yá jeē cáchi ni ñn ñayuu nuū yā ndese íyó táca ñayuu, chi máá yá je jííní yā ndese cáa ini anuá i.

Jeē ní candajñūhún Jesús jíín Nicodemo

3

¹ Te ni íyo ñn tēe grupo fariseo, naní de Nicodemo, te cújéhnú de nuū ñayuu ñuu de hebreo.
² Tēe yáha ní quiiji de nuū Jesús ñn jecuáa, te ni cahān de jíín yá:

Maestro, je cájini na jēē maá Yaā Dios ni tají yá nihín jēē steén ni jnūhun ya nuū na jíínáhan ná. Chi núu tu íyó Yaā Dios jíín ní, te ma cúu sáha ní ni ñn jniñu jéhnú nájñūhun sáha máá ní jeē steén ni poder ní, áchí de.

³ Te ni cahān Jesús:

Jendaá cahán rī jíín ró jeē núu tu nacacu jeé ñn ñayuu, te ma cúu quivī i ndaha Yaā Dios jeē ndacu ya jniñu nuū i, áchí yá jíín de.

⁴ Te ni cahān Nicodemo jíín yá:

¿Te ndese cuu nacacu ñn tēe te núu je ni jehnu de? ¿A cuu nucūhun tucu de chíji náná de te nacacu tucu de? áchí de.

⁵ Te ni cahān Jesús:

Jendaá cahān rī jīn ró jeē núu tú nacacu ñn ñayuu, te ma cúu quīvi i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájñūhun jīn ndute, te condee Espíritu Santo ini anuá i. ⁶ Jeē cácu sáha ñayuu, chí sēhe ñayuu cúu. Te jeē cácu sáha Espíritu yā, chí sēhe ya cúu. ⁷ Ma náā ni rō cani ni rō ndese cúu jñūhun ni cahān rī jīn ró jeē cánuú jēē nacacu jeé ró jijnáhan ró. ⁸ Te tachī chí quée cuahān ndé-ni cúu nuū cuní maá, te jīni sōho ró jēē cáyu, te tu jíní rō ndé nuū véji ni ndé nuū quihín. Te suni súcuan cúu tāca ñáyuu jeē nácacu sáha Espíritu, chí tu jíní rō ndese sáha ya jniñu ún, áchí yá.

⁹ Te ni cahān tucu Nicodemo:

¿Ndese ga cúu núu súcuan?

¹⁰ Te ni cahān Jesús:

Máá ró cúu ñn maestro jeē cujéhnū nuū ñáyuu ñuu yō Israel, te ¿á tu jécūhun ni rō jñūhun yáha naún? ¹¹ Jendaá cahān rī jīn ró jeē jñūhun cájecūhun ni rī cúu jeē cácahān rī jīn ró. Te cánacani cájí rí jñūhun jniñu ní cajito rí. Te tu cá candíje ró jñūhun cácahān rī. ¹² Chí ni cahān rī jñūhun ndese sáha Yaā Dios ini ñayīví, te tu cá candíje ró. Núu súcuan ¿te ndese candíje ró núu cahān rī jñūhun tācá ndese sáha ya nde andiví?

¹³ Chí ni ñn tu ní cáa andiví jeē cúni ndese íyó yúcuan, chí máñúhún-ni ruhū, Yaā ní nduu tēe. Chí andiví ndéé rí, te ni cuun ri véji rí. ¹⁴ Te nájñūhun ni cata caa Moisés ñn coō cāa nuū ñn yujnu, ná ni

cajica ñayuu nuū ñúhun téhé, suni súcuan máá rí, Yaā ní nduu tēe, cánuú jēe cóndita caa ri jicā cruz. ¹⁵ Te súcuan cánuú návāha tāca ñáyuu jeē candíje i jeē jnáma ri i, ma jnahnú ndetū i, chi sa suhva cotecu i ní cáni andiví.

Yōhyo ni cundáhú ni yā ñayuu ñayiví

¹⁶ 'Chi Yaā Dios yōhyo ni cundáhú ni yā ñayuu ñayiví. Jeē yúcuan ní tají yá Sēhe ya ni quiji, vēsú mañúhún-ni ya iyó, návāha tāca ñáyuu jeē candíje i jeē jnáma ya i, ma jnahnú ndetū, chi sa suhva cotecu i ní cáni andiví. ¹⁷ Chi tu ní tájī Yaā Dios Sēhe ya ini ñayiví jēe snahnú ndetū yā ñayuu, chi sa suhva jeē jnáma ya ñayuu.

¹⁸ 'Ñayuu jeē candíje i jeē jnáma ya i, ma jnahnú ndetū i. Te ñayuu tu cándíje, je ni jnahnū ndetū i, chi tu ní cándíje i máá Séhe Yaā Dios, te máá in-ni ya iyó. ¹⁹ Máá Yaā jeē stíndēe ini anuá ñayuu, je ni quee ya ini ñayiví. Te cánujnahān gā ni ñayuu caca i nájnūhun nuū née vēsú nuū luz yā, chi jniñu cásáha i cúu jniñu néé. Jeē yúcuan cúu jeē jnahnú ndetū ñayuu tu cáncandíje ún. ²⁰ Chi tāca ñáyuu casáha jniñu néé, tu nújnahān cuiti ni i luz yā. Te tu jéhe i jnūhun jeē stíndēe yá ini anuá i, chi tu cúní i jeē natūu jniñu néé cásáha i. ²¹ Te ñayuu jeē cájica jíin jniñu ndaā, jéhe i jnūhun jeē stíndēe yá ini anuá i, návāha natūu ndijin jeē tācá jniñu cásáha i cúu jniñu cúní Yaā Dios. Achí yá jíin de.

Jeē ni cáhān tucu Juan jnūhun Jesús

²² Yūcuán na te Jesús jíin tée cáscuáha jíin yá, cuahān yā región Judea. Te ni condee yā yūcuán jecu tiempo jíin de, te cáscuándute de ñayuu. ²³ Te suni scuándute Juan, íne de lugar jeē naní Enón

yajni ñuu Salim, chi yūcuan íyó cuéhē ndute. Te ni quijicoo ñayuu nuū de, te ni scuándute de i.
²⁴ Súcuan ni sáha Juan nde ná tu quiví de vecāa.

²⁵ Yūcuán na te sava tēe cáscuáha jíin Juan yōhyo ni cacahān de jíin sava jnáhan de hebreo siquī núu ndé ñin cúu modo vāha ga jeē cúchi ñayuu ndundoo i nuū Yaā Dios. ²⁶ Te ni quecoo de nuū Juan, te ni cacahān de:

Maestro, tēe ní ine jíin ní yūte Jordán ichi núu cáne niāndii, jeē ní nacani ní jnūhun de nuū ná, vijna te scuándute máá de, te ndivii ñayuu cuangoo i nuū de.

²⁷ Te ni cahān Juan:

Ni ñin tēe ma cúu sáha de jniñu Yaā Dios te núu ma tejniñu ya de. ²⁸ Máá ró jijnáhan ró chi ni cajini sōho ró jēē ni cáhān cají rí jeē násūu máá rí cúu Cristo, chi cúu ri ñin jeē ní tají Yaā Dios jeē cósnūu nacani jnūhun jeē quíji ya. ²⁹ Te núu cásáha vico quíjnáhan, te máá yíi cúu jeē ndéca ñasihí. Te amigo yíi un íne jíin de, te jíni sōho jnūhun cáhān de. Te yōhyo cúsiñi ní jíni sōho jnūhun cáhān yíi ún. Te suni súcuan ruhū, chi cúu ri nájnūhun amigo yíi, chi ni quee máá Cristo, te yōhyo cúsiñi ní rí jíni sōho ri jnūhun cáhān yā. ³⁰ Te jíni ñúhún jēē ndujéhu ga máá yá te ndululí gá máá rí, achí Juan.

Jeē ní quiji ya nde nuū sucún

³¹ Te Yaā jeē véji nde andiví, cújéhu ya nuū ndihí. Chi tāca jēē ní cacu ini ñayiví yáha, sēhe ñayiví cúu, te máni jnūhun ñayiví cáhān. Te Yaā jeē véji ichi ándiví, chi cújéhu ya nuū ndihí ñayuu. ³² Te nácani ya jnūhun jeē ní jito ya jíin jēē ní jini sōho ya. Te ñayuu chi tu cá candíje i jnūhun cáhān yā. ³³ Te

núu ñn ñayuu candíje i jnūhun cáhán yā, suu cúu jeē jejnūhún i jeē Yaā ndaā cúu Yaā Dios. ³⁴ Chi Yaā ní tají Yaā Dios vēji, máni máá jnúhun Yaā Dios cahán yā. Chi Yaā Dios tu yícuāha jéhe ya Espíritu yā nuū Yaā ní tají yá. ³⁵ Máá yá jeē cúu ya Tatá, yōhyo manī yā jíin Séhe ya, te ndívií ni jēhe ya ndaha Séhe ya jeē ndacu ya jniñu nuū. ³⁶ Ñayuu jeē candíje máá Séhe ya jeē jnáma ya i, cotecu i níí cáni andíví. Te ñayuu tu cúni candíje Séhe ya, ma cótecu i níí cáni andíví, chi sa suhva cuāha Yaā Dios castigo jeē ndoho i níí cáni.

Jeē ni cáhān Jesús jíin ñahan ñúu Samaria

4

¹ Te tēe grupo fariseo, ni canihīn de jnūhun jeē iyó cuéhē gā tēe cáscuáha jíin Jesús vēsú jíin Juan, jíin jēe cuehē gā ñayuu scuándute ya vēsú Juan. ² Te nasūu jēe scuándute máá yá, chi tēe cáscuáha jíin yá cúu jeē cascuándute. ³ Te ná ni jini Jesús jeē súcuan ni canihīn de jnūhun, te ni quenda ya región Judea, te cuanuhun yā región Galilea.

⁴ Te ichi jeē nuhún yā chi yáha región Samaria. ⁵ Te ni jinū yā ñn ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán. ⁶ Te yūcuan íne pozo jeē naní pozo Jacob. Te ni cucōo Jesús xiin pozo un, chi ni cuíta yá jeē cuahán yā ichi. Te nájnūhun cahuxī uū cúu. ⁷ Te ni quee ñn ñahan Samaria, vēji ña vequihin ña ndute. Te ni cahān Jesús jíin ña:

Cuāha ní ndute coho ná, áchí yá.

⁸ Te tēe cáscuáha jíin yá, chi je cuangoo de nde ñuu, cuacuaan de jeē cáji de jíin yá. ⁹ Te ñahan Samaria un ní cahān ña jíin yá:

¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cácahān i jíin ñayuu Samaria. ¹⁰ Te ni cahān Jesús:

Núu jeē jiní ni ndese cúni Yaā Díos sáha ya jeē váha níhín, jíin ndé ñn cúu sãña jēē jicán na ndute nuū ní, yūcuán na te máá ní cacān ni núu ná, te cuāha ná ndute jeē cótecu ni ní cáni sáha, áchí yá.

¹¹ Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jēē táva ní ndute. Núu súcuan ¿te ndé nuū nihín ni ndute jeē cótecu na sáha? ¹² ¿Te á cújéñu ga maá ní vēsú jíi yō Jacob, chí naún? Chi máá de ni stóo de pozo yáha nuū yō. Te yāha ní cajihí máá de ndute, jíin táca séhe de, jíin quiiti ndéca de. Achí ña.

¹³ Te ni cahān Jesús:

Tāca ñayuu jeē jíhi ndute yáha, chi jichí tucu i.

¹⁴ Te ñayuu coho ndute jeē cuáha na núu i, chi ma jichí cuiiti gā i. Chi ndute jeē cuáha ná un, cane ini i nájñuhun ndute jeē cáne ñuhún, te sáha jeē cotecu i ní cáni, áchí yá jíin ña.

¹⁵ Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiiti gā ná, ni tuá jíni ñúhun quiquihin ná ndute pozo yáha, áchí ña.

¹⁶ Te ni cahān Jesús jíin ña:

Cuácana ní yñ ní te quiji ní jíin de, áchí yá.

¹⁷ Te ni cahān ña:

Tú yñ ná íyó.

Te ni cahān Jesús:

Ndaā cahán ni jéē tú y# ní íyó. ¹⁸ Chi je ni cuu uhūn y# ní, te tēe ndéca ní vijna chi nasūú y# ní cúu de. Yāha cúu jeē ni cáhān ndaā ní, áchí yá.

¹⁹ Te jeē súcuan ni cahān yā, te ni cahān ña:

Tátā, #n tēe nácani jnūhun Yaā Dios cúu ní, jéni ni ná. ²⁰ Tāca jíi na ñáyuu Samaria, yucu yáha ní cachiñúhún i Yaā Dios. Te máá ní ñayuu hebreo, cácahān ni jéē ñuu Jerusalén cúu nuū cánuú chiñúhún yó yā, achí ña.

²¹ Te ni cahān Jesús jíin ña:

Nánā, candíje ní jnúhun cáhán na, chi quee quivī jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátá, chi ndihī-ni lugar te cuu chiñúhún ní yá. ²² Máá ní ñáyuu Samaria tu cájini ni ndé #n cúu jeē cáchiñúhún ní. Te máá ná jijnáhan ná chi cájini na ndé #n cúu jeē cáchiñúhún ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñayuu. ²³ Te je ni quee quivī jeē ñáyuu cáchiñúhún ndáā, vijna te chiñúhún ndije i Yaā cúu Tátá nde jíin ini jíin ánuá i. Chi máá Tátá cúní yā jeē súcuan chiñúhún ñáyuu yā. ²⁴ Yaā Dios cúu Espíritu, te ñayuu jeē cuní i chiñúhún i ya, cánuú jéē chiñúhún ndije i ya jíin ini jíin ánuá i, áchí yá.

²⁵ Te ni cahān ñahan ún:

Jíiní na jéē quíji Mesías jeē cúu Cristo, Yaā jeē tají Yaā Dios. Te núu ni quee maá yá, te stéén cají yá tāca jnúhun nuū yō.

²⁶ Te ni cahān Jesús:

Máá ná jeē cahán jíin ní, suu ná cúu Yaā ún.

²⁷ Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē

ndájnūhun yá jíin ñahan yúcuán. Te ni ñin de tu ní cájnūhún de ya núu na vé cájnūhun yá ña chí na vé ndájnūhun yá jíin ña. ²⁸ Yūcuán na te ñahan un ní stóo ña quīyī ña, te cuahān ña nde ñuu. Te ni cahān ña jíin ñáyuu ún:

²⁹ Nehen na quíngoo yó te coto ró ñin tēe jeē ní cachi ndihi tāca jēē ni sáha ri. Sanaa te máá yá cúu Cristo, jeē cándetu yó quiji, áchí ña.

³⁰ Yūcuán na te ni quendacoo i ñuu ún, te cuangoo i nuū íne Jesús. ³¹ Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, caji ni stáā víi, achí de.

³² Te ni cahān yā jíin de:

Iyó stáā caji rī jeē tu cájini rō ndese cúu.

³³ Yūcuán na te tēe cáscuáha jíin yá, ni cacajnūhun jnáhan de:

¿A ní quindecā ñin ñayuu jeē ní yeji yā, chí naún? áchí de.

³⁴ Te ni cahān Jesús:

Jeē ní cachi rī jeē iyó jēē cáji rī cúu jeē cúsiñi ní rī sáha ri jniñu cúní Yaā ní tají rúhū vēji ri, jíin jēē sínu ri jniñu ún. ³⁵ Te cácahān rō jeē cúmanī cuūn gā yoō te tahndē trigo. Te ruhū chi cáhān rī jíin ró: Condēhe jíjnáhan ró, chí ñayuu cuehē cácuu i nájnūhun trigo jeē jé ni cuaan jeē tahndé, chí je cáhiyo tūhva i candíje i ruhū. ³⁶ Te tēe scándíje ñayuu cácuu de nájnūhun tēe cájehnde trigo, te nihīn de yāhu de. Te jeē cánastútú de ñayuu cúu jeē cótecu i ní cáni andiví. Te tēe cáscuíté núu jnūhun rī, inuú-ni cusī ni de jíin tēe cástéén gā jnūhun rī. ³⁷ Chi ndaā cúu jnūhun jeē cahán: ñin tēe jéte, te inga tēe nástútú, áchí. ³⁸ Te suu cúu jeē ní tají

rí rohó jíjnáhan ró jéē scándíje ró ñayuu jeē jé ni canihīn jnūhun ya ni casáha inga tēe. Chi inga tēe je ni canacani de jnūhun nuū ñáyuu, te máá ró chi nájnūhun cánastútú ró i cúu jeē scándíje ró i.

³⁹ Te cuehē ñayuu Samaria jeē cáyūcú ñuu ún, ni cacandíje i Jesús jeē ní jini sōho i jnūhun ni cahān ñahan ún. Chi ni cahān ña: Ni cachi ya ndihī tāca jéē ni sáha ri. ⁴⁰ Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yūcuan úu quivī. ⁴¹ Te cuehē gā i ni cacandíje i ya jíin jnūhun cáhán maá yá. ⁴² Te ni cacahān i jíin ñahan ún:

Tuá niní jéē cahán maá ró te candíje ri yā, chi je ni cajini sōho ri jnūhun cáhán maá yá. Te cajini yō jeē maá yá cúu ndíje Cristo, Yaā jnama ñayuu ñayivī. Achí i.

Jeē ní nasávāha ya sēhe tēe ndíso jniñu nuū rey

⁴³ Te nuū ni yáha uū quivī ún, te Jesús ni quenda ya Samaria, te ni quihin tucu ya ichi cuanuhun yā región Galilea. ⁴⁴ Chi je ni cahān maá yá jeē tēe canacani jnūhun Yaā Dios, tu cáhīyo yíñúhún ñayuu ñuu de jíin de, te suni súcuan ni cuu jíin máá yá. ⁴⁵ Te ná ni najinū yā Galilea, te ñayuu un ní cajetáhú i ya, chi suni máá i ni jengoo i vico pascua ñuu Jerusalén, te ni cajito i tācá jniñu ní sáha ya quivī ni íyo vico ún.

⁴⁶ Yūcuán na te ni jehēn tucu ya ñuu Caná ndañū Galilea, nuū ni sáha ya jeē ndúte ni nduu vino. Te ini ñuu Capernaum ni íyo ñin tēe cújéhnū jeē ndíso jniñu nuū rey. Te cúhú sēhe de. ⁴⁷ Tēe un ní jini jnūhun de jeē ní najinū Jesús región Galilea jeē ni jéhēn yā región Judea. Te ni jecondéhé de ya, te ni

cahān ndahú de jíin yá jeē na quíhín yā jíin de vehe de, te nasávāha ya sēhe de, chí je yajni cuu i. ⁴⁸ Te ni cahān Jesús jíin de:

Núu tú coto ró jniñu jéhnu jeē náā ni rō sáha, te ma candíje cuiti rō jijnáhan ró, áchí yá.

⁴⁹ Te tēe ndíso jniñu nuū rey, ni cahān de:

Cava vāha ni ní na quíhín yō, chí núu cucuéé ní te cuu sēhe ná, áchí de.

⁵⁰ Yūcuán na te ni cahān Jesús:

Cuánuhun vehe ró, chí cotecu sēhe ró.

Te tēe un ní candíje de jnūhun ni cahān Jesús, te cuanuhun-ni de. ⁵¹ Te níni jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

⁵² Te ni cajnūhún de na hora ni quejéé ndúvāha i. Te ni cacahān i jíin de:

Cahān jeē ícu ni quenda quíji i.

⁵³ Yūcuán na te máá tátá i ni sáha de cuenta jeē hora un cúu jeē ni cáhān Jesús jíin de jeē cótecu sēhe de. Te ni candíje de jíin ní vehe de jeē cúu ya Yaā ní tají Yaā Dios.

⁵⁴ Yāha cúu vuelta uū jeē ni sáha Jesús jniñu jéhnu jeē ni stéén yā poder yā región Galilea, jeē ní najinū yā jeē ni jéhēn yā región Judea.

Jeē ní nasávāha ya ñn tēe cátú yuhu pila Betesda

5

¹ Yūcuán na te cuahān tucu Jesús ñuu Jerusalén, chí íyó tucu vico cásáha jnáhan ñuu yā hebreo. ² Te Jerusalén iyó ñn pila ndute yajni yéhyí jéē naní yéhyí lanchi. Te yuhu hebreo naní Betesda. Te nuū

íne pila un íyó úhūn corredor. ³ Te ini tācá corredor un cácaā cuehē ñayuu cácuhū, jeē cuaá, jeē chacuá, jeē ní íjin. Te cándetu i jeē canda ndute ún. ⁴ Chi íyó quívi jeē cúun ñn ndajéhé yā ini pila un, te scánda ya ndute. Te ñayuu quívi xihna gā ini pila un ná scánda ya ndute, te ndúvāha i na-ni cuehyī ndóho i. ⁵ Te yūcuan íyó ñn tēe jeē ní cuu ocō xahūn unī cuiyā cuhú de. ⁶ Te ni jito Jesús jeē catú de, te ni jini yā jeē ní cuu cuehē cuiyā cuhú de. Te ni cahān yā jíin de:

¿A cúni rō nduvāha ró? áchí yá.

⁷ Te ni cahān tēe cúhú un jíin yá:

Tu níhín na ni ñn tēe squívi sañá ini pila hora jeē cánda ndute. Chi tāca jínu jeē cuní na quívi ná, te quívi-ni inga ñayuu xihna gā. Achí de.

⁸ Te ni cahān Jesús:

Ndocuññi te naquihin ró camilla rō te caca ró, áchí yá.

⁹ Te tēe un ní nduvāha-ni de. Te ni naquihin de camilla de, te ni quejéé de jíca de. Te quívi ndétātu cúu quívi ún. ¹⁰ Yūcuán na te jnáhan de tēe hebreo un ní cacahān jíin de:

Quívi ndétātu cúu vijna. Te áchí ley jeē ma cúu condiso ró camilla rō.

¹¹ Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin rí camilla rí te caca rí, achí de.

¹² Yūcuán na te ni cacajnūhún un de:

¿Ndé tēe ni cahān jíin ró jeē náquihin ró camilla rō te caca ró?

¹³ Te tēe ni nduvāha ún, tu jíni de ndé ñn cúu jeē ní nasávāha de. Chi cáhīn cuehē ñayuu yūcuán, te

Jesús je cuahān yā. ¹⁴ Te cúcuéé gá te ni najnáhan Jesús jíin de ini templo cáhnu. Te ni cahān yā:

Vijna chi je ni nduvāha ró. Ma sáha ga rō cuēchi, chí núu tuú, te quiji ñn jnūndóho xeēn gā s̄iquī rō, achí yá.

¹⁵ Yūcuán na te cuahān tēe ún, te ni castūhún de nuū jnáhan de hebreo un jēe Jesús cúu jeē ní nasávāha ya de. ¹⁶ Te s̄iquī jeē ní sáha Jesús jniñu yáha quívī ndétátú, jeē yúcuán cúu jeē tée hebreo un cájito xeēn de ya, te cáconi de cahni de ya. ¹⁷ Te ni cahān Jesús jíin de:

Maá Tátá rī chí ní cáni te nde vijna sáha ya jniñu váha, te suni súcuan ruhū sáha ri jniñu váha.

¹⁸ Te s̄iquī jeē ní cahān yā súcuan, te tēe hebreo un víhyá gā cáconi de cahni de ya. Chí nasūu maá ñn-ni jeē tu squícu ya jeē cahán ley s̄iquī quívī ndétátú, chí suni jeē ní cahān yā jeē Tátá yā cúu Yaā Dios, te súcuan sáha ñnuú yá maá yá jíin Yaā Dios.

S̄iquī jeē ndíso jniñu Sēhe Yaā Dios

¹⁹ Te ni cahān Jesús:

Jendaá cahán rī jíin ró jijnáhan ró: Ruhū jeē cúu Sēhe Yaā Dios, tú na vé cúu sáha ri jeē maá rí, chí máni sáha ri jeē jíto ri sáha Tátá rī. Chí tāca jēe sáha Tátá rī, suni sáha ruhū jeē cúu ri Sēhe ya. ²⁰ Chí maá Tátá rī, manī yā jíin ruhū jeē cúu ri Sēhe ya, te stéén yā nuū rī ndihi jeē sáha ya. Te jéhnu ga jniñu stéén yā vésú jeē ní cuu vijna, jeē naa ni rō coto ró jíjnáhan ró. ²¹ Te nájnūhun jeē nastécu maá Tátá rī ndīyī te cotecu tucu i, suni súcuan ruhū jeē cúu ri Sēhe ya, nastécu rī ndé-ni cúu jeē cuní maá rí. ²² Te maá Tátá rī, tu sándaā yā s̄iquī ni ñn ñayuu, chí ni jēhe ya jnūhun jeē sándaā maá rí s̄iquī tāca ñayuu,

chi Sēhe ya cúu ri. ²³ Te súcuan te coo yíñúhún ndíhi ñayuu nuū rī, nájñūhun yíñúhún i nuū Tatá rī. Te ñayuu tu íyó yíñúhún núu rī, núu súcuan te suni tu yíñúhún i nuū maá Tátá rī jeē ní tají yá ruhū vēji ri.

²⁴ Jendaá cahán rī jíin ró: Núu ññ ñayuu chuhun ni i jñūhun cáhán rī, te candíje i jeē Yaā ndaā cúu Yaā ní tají rúhū vēji ri, ñayuu ún cotecu i ñí cáni andiví, te ma jnahnú ndetū i. Chi ma cúu ga i nájñūhun ndīyi, chi sa suhva cotecu i ñí cáni.

²⁵ Jendaá cahán rī jíin ró jeē quiji quiví, te vijna je ni quejéé, jeē tāca ñáyuu cácuu nájñūhun ndīyi, cuni nahín i jñūhun cáhán ruhū, Sēhe Yaā Dios. Te ñayuu cuatáhú, chi cotecu i ñí cáni.

²⁶ Chi nájñūhun íyó poder maá Tátá rī jeē sáha ya jeē técu ndíhi-ni, suni súcuan ni jēhe ya poder nuū ruhū jeē sáha ri jeē cotecu ndíhi-ni.

²⁷ Te suni ni sáha ya jeē ndíso jníñu ri sándaā rī siquí ñayuu, chi cúu ri Yaā ní nduu tēe. ²⁸ Ma náa ni rō caní ni rō siquí jnúhun cáhán rī. Chi quee quiví jeē tāca ndīyi cuni sōho i jñūhun cahán rī, ²⁹ te quendacoo i nuū yíndūji i. Te ndīyi jeē ní casáha jniñu váha, natecu i jeē cótecu i ñí cáni. Te ndīyi jeē ní casáha jniñu néé, natecu i te quivícoo i nuū jnahnú ndetū i.

Ndé vé cúu jeē steén jeē ní tají Yaā Dios yā

³⁰ Tú na vé cúu sáha ri jeē maá rí. Chi nájñūhun ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chi tu sáha ri jeē cuní maá rí, chi sáha ri jeē cuní maá Tátá rī, Yaā ní tají rúhū vēji ri. ³¹ Núu ruhū cahán rī jeē cúu ri Sēhe Yaā Dios, te cachi ñayuu jeē tu jéjníñu jñūhun cáhán rī.

³² Te íyó inga jeē cahán jeē cúu ri Sēhe ya. Te jíní rī jeē jnúhun un jéé cahán yā, chi níhín jniñu. ³³ Máá

ró ni catají ró tēe ni cacajñūhún de Juan. Te Juan chi ndaā ni cahān de jñūhun ri. ³⁴ Te vēsú súcuan te nasūu rúhū cúu jeē jíni ñūhún jeē steén ñn tēe jeē Séhe Yaā Dios cúu ri. Chi máá ró cúu jeē jíni ñūhún návāha candíje ró te cācu ró jíjnáhan ró. Jeē yúcuan ní cahān rī jeē iyó ndāā jñūhun ri jeē ní nacani Juan. ³⁵ Máá Juan ni cuu de nájñūhun ñn lámpara jeē cayú te cúndijin, cúu jeē ní nacani de jñūhun ri. Te máá ró, jecu-ni quivī ni canujnahan ni rō jeē ni stéén de nuū rō. ³⁶ Te iyó jēē steén cají gá jeē kujéhnū ri vēsú jeē ni cáhān Juan. Suu jniñū sáha ri, jniñū jeē ní tejniñū Tátá rī ruhū jeē sáha ri, jniñū un stéén ndije jeē maá yá ni tají rúhū vēji ri. ³⁷ Te Tátá rī jeē ní tají yá ruhū vēji ri, suni máá yá cahán nuū tutu īi jeē kujéhnū ri, vēsú tu ní cájini sōho cuiti rō jeē cahán yā, ni tu ní cájito ró yá. ³⁸ Te tu ní cáchuhun ni rō jñūhun un jēē ni cáhān Tátá rī, chi tu cácandíje ró rúhū, Yaā ní tají yá vēji. ³⁹ Cánanducú vii rō tāca jñūhun cáhán tutu īi, chi cájeni ni rō jeē yūcuan níhīn rō jñūhun jeē cótecu rō ní cáni sáha. Te jñūhun siquī maá rí cúu jeē cahán tutu ún. ⁴⁰ Te vēsú súcuan te tu cácuni rō cuatáhú ró ruhū quivīcoo ró ndaha ri návāha cotecu rō ní cáni.

⁴¹ 'Tu chíhi ri cuenta jñūhun jeē cácahān ñayuu jeē kujéhnū ri. ⁴² Chi je jíni rī ndese cándāa ánuá rō jeē tu cáhīyo manī rō jíin Yaā Dios. ⁴³ Ruhū vēji ri jíin jniñū cúní Tátá rī, te tu cájetáhú ró ruhū. Te núu inga tēe quee de jíin jniñū cúní maá de, sa tēe un yáchī cuatáhú ró de. ⁴⁴ ¿Ndese cuu candíje ró jíjnáhan ró? Chi máni cácuni rō jeē kujéhnū ró sáha jñáhan ró, te tu cánducú ró jeē kujéhnū ró sáha Yaā Dios, jeē maá ñn-ni ya iyó. ⁴⁵ Ma cáni ni rō jeē

cáquin rī cuēchi siquī rō nuū Tatá rī. Chi íyó ìn jeē cáquin cuēchi siquī rō, suu Moisés, tē jeē cáñuhun ni rō jeē quendōo ndaā rō jíin ley jeē ní tee de. ⁴⁶ Chi núu ní cá candíje ró jéē ní tee Moisés, te suni candíje ró rúhū nuú, chi jnūhun máá rí ni tee de. ⁴⁷ Te núu tu cá candíje ró jnūhun ri jeē ní tee de, ¿te ndese candíje ró jnūhun cáhán maá rí núu súcuan? Achí yá jíin de.

Jeē ni scáji yā uhūn mil tēe
(Mt. 14.13-21; Mr. 6.30-44; Lc. 9.10-17)

6

¹ Yūcuán na te cuahān Jesús inga lado mar Galilea, jeē cúu mar Tiberias. ² Te yōhyo cuehē ñayuu ni candiquīn i ya, chi ni cajito i tācá jniñu jéhnú jeē steén yā poder yā jeē ní nasávāha ya ñayuu cácu hū. ³ Te ni caa ya ìn yucu, te ni cucōo ya yūcuan jíin tēe cáscuáha jíin yá. ⁴ Te je ni cuyajni vico pascua jeē cánucūhun ni jnáhan ñuu yā hebreo jeē ní cacācu i nuū ñáyuu nación Egipto. ⁵ Te ni ndacoto ya, te ni jito ya jeē véjicoo cuehē ndasí ñáyuu. Te ni cahān yā jíin Felipe:

¿Ndé nuū cuaan yó jéē cáji ñayuu yáha jíjnáhan i?

⁶ Te súcuan ni cahān yā jeē jito ndee yā de núu ndese cahān de. Chi je jíin maá yá ndese sáha ya.

⁷ Te ni cahān Felipe jíin yá:

Te ni ma cánda uū ciento denario staā, ni vésú jeē cáji i jecu jecu jíjnáhan i, áchí de.

⁸ Yūcuán na te ni cahān Andrés, ñani Simón Pedro, inga tēe scuáha jíin yá un:

⁹ Yāha íne ñn sūchi yí jéē ndíso i uhūn staā cebada jíin ū chācá. ¿Te ndé canda cuiti ún, chi ñayuu cuehē ndasí cúu?

¹⁰ Yūcuán na te ni cahān Jesús:

Cahān jíin ñáyuu na cúcō i, áchí yá.

Te yūcuan cáa cuehē ite, te ni cacucōo i, te nájñūhun uhūn mil tēe cúu. ¹¹ Te ni quihin Jesús staā ún, te ni nacuatáhú yá nuū Yaā Dios. Te ni jēhe ya nuū tēe cáscuáha jíin yá, te máá de ni casaja de nuū ñáyuu ní cacucōo ún. Te suni súcuan ni sáha ya jíin cháca, te ni cayejí i nasaa cácuni maá i. ¹² Te nuū ní candutú chíjí i, te ni cahān yā jíin tēe cáscuáha ún:

Nastútú ró tēcá pedazo jeē ni ndóo, návāha tu stívi cuiti yō.

¹³ Te ni canastútú de, te ni chitú úxī uū jīca pedazo jeē ni ndóo siquī ndihúhún staā cebada un jeē tuá ni ndíhi caji ñayuu. ¹⁴ Te ñayuu un ní cajito i jniñu jéhnū ni sáha Jesús jeē ni stéén yā poder yā. Te ni cacahān i:

Jendaá ndije jeē tēe yáha cúu jeē cahán tutu jeē quíjí ini ñayívi jéē nácani jñūhun Yaā Dios. Achí i.

¹⁵ Te ni jini Jesús jeē cácuni i sáfuerza i ya jeē cuu ya rey i núú. Te ni cujiyo tucu máá ñn-ni ya, ni caa ya cuahān yā nuū sucún gá yucu.

*Jeē ní jica jéhé yá nuū mar
(Mt. 14.22-27; Mr. 6.45-52)*

¹⁶ Te nuū cuácuaa, te tēe cáscuáha jíin yá ni nanuu de cuango de nde mar. ¹⁷ Te ni ndívicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. ¹⁸ Yūcuán na te ni jequíhi ñn tachí níhin, te sáha jeē ndónnda ndute mar un. ¹⁹ Te

jeē ní cuu nájnūhun uhūn chí íñū kilómetro cájica de jíin barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayūhú de. ²⁰ Te máá yá ni cahān yā jíin de:

Máá rí cúu. Ma yūhu ró jijnáhan ró.

²¹ Te ni cacusī ni de jeē na quívi ya ini barco. Te ni sáha ya jeē yachī-ni ni jinūcoo-ni de ñuhun íchi núu cuángoo de ún.

Jeē cánanducú ñayuu Jesús

²² Te inga quívi ún, te ñayuu jeē ní caquendōo inga lado mar, ni cajini i jeē tée cáscuáha jíin yá cuangoo de jíin máñúhún-ni barco ni íne yūcuán, jíin jéē tu ní quívi Jesús quihīn yā jíin de jijnáhan de. ²³ Te sava ga barco jeē véjicoo íchi ñūū Tiberias, ni quecoo yajni lugar nuū ní cayeji i staā jeē ní nacuatáhu máá Jítóho yō jehē. ²⁴ Te jeē ní cajito ñayuu un jéē tuá Jesús íne ya yūcuán, ni tée cáscuáha jíin yá, te ni quívicoo i táca barco un, te cuangoo i ñuu Capernaum cuananducú i ya.

Jesús cúu staā jeē cótecu yō ní cáni

²⁵ Te nuū ni jínūcoo i nde inga lado mar, te ni nanihīn jnáhan i jíin Jesús. Te ni cacajnūhún i ya:

Maestro, ¿na hora ni quee ni yáha?

²⁶ Te ni cahān Jesús:

Jendaá cahán rī jíin ró jeē cánanducú ró ruhū síquī jeē ní cayeji rō nde ni candutú chíji ró, te nasūu síquī jeē ní cajito ró táca jniñu jénu jeē steén rī poder rī. ²⁷ Ma cóndihvī ni rō maá síquī jeē caji rō jeē yachī nataxīn, chí sa suhva condihvī ni rō síquī jeē nihín rō jeē cótecu rō ní cáni sáha. Te máá rí, Yāá ní nduu tée, cuāha ri nájnūhun staā jeē cótecu

rō ní cáni sáha. Chi Tátá rī Yaā Dios ni jeni ya ruhū jeē sáha ri súcuan. Achí yá jíin i.

²⁸ Yūcuán na te ni cacajñuhún i ya:

¿Ndese sáha ná návāha squícu ná jniñu cúní Yaā Dios?

²⁹ Te ni cahān Jesús:

Jniñu jeē cúní Yaā Dios cúu jeē candíje ró rúhū, Yaā ní tají yá vēji.

³⁰ Yūcuán na te ni cacahān i:

Núu súcuan ¿te na jniñu jéhu sáha ní coto ná jíjnáhan ná te candíje ná jéē ní tají yá nihín? ¿Na jniñu cúu jeē sáha ní? ³¹ Chi tāca jíí yō jenahán ni cayejí de maná jeē ní cuun ichi ándiví ndé nuū ñúhun téhé, nájnūhun yósó núu tútu: Yaā Dios ni jéhe ya staā ni cuun ichi ándiví, ni cayejí i, áchí tutu. Achí i jíin yá.

³² Te ni cahān Jesús:

Jendaá cahán rī jíin ró: Nasūú Moisés ni jéhe staā un núu de jíjnáhan de jeē ní cuun ichi ándiví, chi máá Tátá rī ni jéhe. Te máá yá jéhe staā andiví jéē cótecu rō ní cáni sáha. ³³ Chi staā jéhe Yaā Dios cúu máá Yaā ní quiji ichi ándiví, te sáha ya jeē ñáyuu ñayiví cotecu i ní cáni andiví. Achí yá.

³⁴ Te ni cacahān i jíin yá:

Níní cuáha ni stáā ún caji na núu súcuan.

³⁵ Te ni cahān Jesús:

Máá rí cúu máá stáā jeē cótecu rō ní cáni sáha. Ndé vé quívi ndaha ri, ma cúu cuiṭi gā sōco. Te ndé vé candíje ruhū, ma jichí cuiṭi gā. ³⁶ Te nájnūhun je ni cahān rī jíin ró, tu cáncandíje ró rúhū, vēsú ni cajito ró núu rī. ³⁷ Tāca ñáyuu jeē sáha Tátá rī jeē candíje i ruhū, máá i quívicoo ndaha ri. Te jétáhú rí tāca jéē cúní quívi ndaha ri, chi ma squéhichī cuiṭi

rī quihīn. ³⁸ Chi ni quiji ri ichi ándiví návāha sáha ri jniñu jeē cuní Yaā ní tají rúhū, te nasūu jeē sáha ri jeē cuní maá rí. ³⁹ Te jniñu jeē cuní Tatá rī, Yaā ní tají rúhū, cúu jeē ma scuíta ri ni ññayuu ni jéhe ya nuū rī, chi condito ri i te nastécu rī i quiví jínu ññayíví. ⁴⁰ Te Yaā ní tají rúhū, cuní yā jeē tāca ññayuu jeē nihín i jnūhun ruhū, Sēhe Yaā Dios, te candíje i ruhū, cotecu i ñí cáni andiví. Chi nastécu rī i quiví jínu ññayíví. Achí yá.

⁴¹ Yūcuán na te ni caquejéé jnáhan ñuu yā hebreo cácahān de siquī yā, chí ni cahān yā jeē maá yá cúu staā ní quiji ichi ándiví. ⁴² Te ni cacahān de:

¿A násūu tée yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ni quiji de ichi ándiví núu súcuan?

⁴³ Te ni cahān Jesús jíin de:

Ma cahán rō siquī rī jijnáhan ró. ⁴⁴ Ni ññayuu ma cúu quiví i ndaha ri núu ma sáha Tátá rī jeē cúu ni i quiví i, chi máá yá ni tají rúhū vēji ri. Te nastécu rī i quiví jínu ññayíví. ⁴⁵ Te suhva yósó núu tútu ni catee tēe ni canacani jnūhun Yaā Dios: Tācá i chi stéén Yaā Dios nuū i, áchí. Núu súcuan te tāca ññayuu jíni sōho jnūhun cáhán Tatá rī, te jétáhú i jeē steén yā nuū i, ññayuu ún chi quívicoo i ndaha ri.

⁴⁶ Te tu ní jíto ni ññayuu nuū maá Tátá rī. Chi máñúhún-ni ruhū ni jito ri nuū yā, chi nde nuū maá yá vēji ri. ⁴⁷ Jendaá cahán rī jíin ró jijnáhan ró jéé ññayuu jeē candíje i jeē jnáma ri i, máá i cotecu i ñí cáni. ⁴⁸ Máá rí cúu staā jeē cótecu rō ñí cáni sáha. ⁴⁹ Tāca jíi rō jenahán, ni cayejí de staā maná jeē ní cuun ichi ándiví ndé nuū ññuhun téhé, te tu ní sáha jeē cótecu de ñí cáni andiví. ⁵⁰ Te staā jeē

cahán rī jeē véji ichi ándiví, chi na-ni ñayuu caji, te cotecu i ñí cáni andiví. ⁵¹ Te suu máá rí cúu staā un jéē ní quiji ichi ándiví jéē sáha jeē cótecu rō ní cáni. Te ñayuu jeē caji staā yáha, cotecu i ñí cáni andiví. Te staā jeē cuáha rī un cúu yiqui cúñu rī, te cuáha rī návāha ñayuu ñayiví cotecu i ñí cáni andiví. Achí yá.

⁵² Yūcuán na te jnáhan ñuu yā hebreo ni cacahān de jíin táca jnáhan de:

¿Ndese cuu cuáha tēe yáha yiqui cúñu de caji yō? achí de.

⁵³ Te ni cahān Jesús jíin de:

Jendaá cahán rī jíin ró: Núu tú candíje ró jéē yiqui cúñu ruhū, Yaā ní nduu tēe, cúu nájnūhun staā, te niñī rī cúu nájnūhun ndute, núu súcuan te ma cótecu rō ní cáni andiví. ⁵⁴ Chi ñayuu cáncandíje jeē yiqui cúñu rī cúu nájnūhun staā te niñī rī cúu nájnūhun ndute, máá i cotecu i ñí cáni. Te nastécu rī i quiví jínu ñayiví. ⁵⁵ Chi yiqui cúñu rī jíin niñī rī cúu ndije jeē sáha jeē cótecu i ñí cáni. ⁵⁶ Te ñayuu cáncandíje jeē yiqui cúñu rī jíin niñī rī cúu nájnūhun staā jíin ndute jeē cótecu i ñí cáni sáha, máá i níní ndúú i jíin rí, te ndúú rí jíin i. ⁵⁷ Máá Tátá rī, Yaā técu, ni tají yá ruhū véji rī, te técu rī sáha máá yá. Te suni súcuan, ñayuu cáncandíje jeē cúu rī nájnūhun staā i ndute i, suni súcuan cotecu i ñí cáni sáha rī. ⁵⁸ Máá rí cúu staā ní quiji ichi ándiví. Te staā jeē cahán rī tu cúu nájnūhun staā maná jeē ní cayeji tāca jíi rō jenahán, chí tu ní sáha jeē cótecu de ñí cáni. Te staā jeē cahán rī, chí ñayuu caji, cotecu i ñí cáni sáha, áchí yá.

⁵⁹ Tāca jnúhun yáha ní steén Jesús nuū ñáyuu ní candutútú ini vehe iī sinagoga ñuu Capernaum.

Jnūhun cotecu yō nī cáni

⁶⁰ Te cuehē ñayuu cascuáha jíin yá, ni cajini sōho i jnūhun yáha jéē ni stéén yā. Te ni cacahān maá i:

Yōhyo yí jnúhun cáhán yā yāhá. ¿Ndese cuu cuatáhú yó?

⁶¹ Te ni jini Jesús jeē cácahān i jeē yí cúu jnūhun yāhá, te ni cahān yā jíin i:

¿A yí sáha jnūhun yáha jíin ró jijnáhan ró? ⁶² ¿Te ndese sáha ró núu coto ró jéē ruhū, Yaā ní nduu tēe, ndaa ri nuhun rī nuū ni cóndee rī xīhna ñúhún?

⁶³ Máa ánuá ñayuu cúu jeē sáha jeē técu i. Chi yíqui cúñu i tu jéjníñu cuiñi súcuan. Te tāca jnúhun ni cahān rī jíin ró cúu jeē quéndōo vāha ánuá rō, te cotecu rō nī cáni sáha. ⁶⁴ Te sava ró chi tu cácañdije ró. Achí yá.

Chi nde xīhna ñúhún je jíin Jesús ndé-ni cúu ñayuu jeē ma cándije, jíin ndé ñn de cúu jeē nastúu de ya. ⁶⁵ Te ni cahān gā yā:

Jeē yúcuani ní cahān rī jíin ró jeē ma cúu quívi ni ñn ñayuu ndaha ri, te núu tu sáha Tátá rī jeē cúu ni i quívi i, achí yá.

⁶⁶ Te nde quívi ún te cuehē ñayuu cascuáha jíin yá, ni castóo i ya, te tuá ni cájica i jíin yá. ⁶⁷ Yūcuán na te ni cahān yā jíin máa ndihúxí uū tēe cáscuáha jíin yá:

¿A suni cácuni máá ró quingoo ró, chí naún?

⁶⁸ Te ni cahān Simón Pedro:

¿Ndé núu gā quingoo ná? Chi máa ní cúu jeē nácani jnūhun jeē cótecu na nī cáni sáha. ⁶⁹ Te ni cacandije ná te cájini na jéē maá ní cúu Cristo, Sēhe Yaā Dios, Yaā técu, achí de.

⁷⁰ Te ni cahān Jesús:

Te vēsú ni nacāji ri ndihúxí uū rō, te íyó ñn ró jeē ní quívi jexeén ini. Achí yá.

⁷¹ Te súcuan ni cahān yā siquī Judas Iscariote, sēhe Simón. Chī máá de nastúu de ya, vēsú ñn jnāhan jeē uxí uū tēe cáscuáha jín yá cúu de.

Jeē tu ní cá candíje ñani Jesús

7

¹ Yūcuán na te jíca cuu Jesús región Galilea. Chi tu cúní yā caca cuu ya región Judea, chī jnāhan ñuu yā hebreo jeē cáyūcu yúcuan, cácu ni de cahni de ya. ² Te cuacuyajni vico jeē casáha ñayuu yā hebreo vehe ramadá, cáyūcú i chíji. ³ Te ñani yā ni cacahān de jín yá:

¿Naun máá yáha-ni íne ró? ¿Naun tú quihín rō región Judea, návāha tēe yūcuán jēē cá candíje de rōhó, suni coto de jniñu jéhu sáha ró. ⁴ Chī núu cúní ñn tēe jeē cuité núu jnūhun de, te tu sáha yuhu de jniñu. Te núu sáha nde ró táca jniñu jéhu, vāha ga na sáha ró jēē cúni ndivii ñayuu.

⁵ Súcuan ni cacahān ñani yā jín yá, chī ni máá de tu cá candíje de ya. ⁶ Yūcuán na te ni cahān Jesús:

Ná tu quee maá quívi jeē quihín rī. Te máá ró jijnāhan ró chī na-ni quívi-ni te cuu quingoo ró.

⁷ Chī ma quití ni ñayuu ñayivi núu rō, te máá rí chī quití ni i jító i ruhū, chī cáhán rī jeē jiní rī jeē máni jniñu néé cásáha i. ⁸ Cuángoo máá ró vico ún. Te máá rí chī ma quihín rī vijna, chī ná tu quee maá quívi cánuú quihín rī. Achí yá.

⁹ Súcuan ni cahān yā jnūhun yáha jín de, te ni quendōo ya Galilea.

Jeē ni jéhēn Jesús vico vehe ramadá

¹⁰ Te nuū ni yáha ñani yā cuangoo de vico ún, te sáa te suni cuahān maá yá. Te tú cuahān ndijin yā, chi tu ní stéen yā maá yá. ¹¹ Te jnáhan ñuu yā hebreo cánanducú i ya nuū víco ún, te cácahān i:

¿Ndé nuū íne tēe ún? áchí i.

¹² Te yōhyo ni cacahān ñayuu jeē siquí yā, chi sava i cácahān: Tēe vāha cúu de. Te sava ga i cácahān: Tuú chi stáhú de ñayuu.

¹³ Te yuhu-ni ni cacahān i jnūhun ya, chi cáyūhú i jeē quití ni jnáhan i tēe hebreo.

¹⁴ Te jeē ní cuu sava vico, te ni quee Jesús, ni quívi ya templo cáhnu, te ni quejéé yá steén yā jnūhun. ¹⁵ Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíni tēe yáha cuéhē jnūhun ndíchí, chi tu ní jíca de escuela? áchí i.

¹⁶ Yūcuán na te ni cahān Jesús:

Jnūhun stéen rī chi nasūu jnúhun máa rí cúu, chi jnūhun jeē ni jéhe máa Yaā ní tají rúhū cúu. ¹⁷ Núu ñn ñayuu cuní i sáha i jniñu cuní Yaā Dios, ñayuu ún chi jecūhun ni i núu nde nuū Yaā Dios vēji jnūhun stéen rī, chí jnúhun jeē jéni ni maá-ni ri cúu. ¹⁸ Tēe cáhán jnūhun jéni ni maá de, tēe un ndúcú de jeē na sájéhnu ñayuu de. Te núu ñn tēe ndúcú de jeē sajéhnu de Yaā ní tají de, tēe un cúu tēe ndaā, te tú na jnūhun stáhú íyó jíin de.

¹⁹ ¿A násūu jéē ni jéhe Moisés ley yā nuū rō jeē squícu ró? Te ni ñn ró tu cásquícu. Chi sa jeē cácuni rō cahni rō ruhū, ¿te najehē cúu? Achí yá.

²⁰ Te ni cacahān ñayuu cuehē ún:

Tachī ndóho ró. ¿Ndé ñn cuní cahni rohó?

²¹ Te ni cahān Jesús:

Ni nasávāha ri ñn tē quivī ndétātú, te ndivii rō ni canaa ni rō ni cajito ró jéē quiví ndétātú ni sáha ri jniñu ún. ²² Te Moisés ni jēhe de ley jeē cúu circuncidar nuū rō. Te cásáha ró circuncidar sūchi yí núu uná quivī jeē ní cacu i, vēsú quivī ndétātu cúu. (Te nasūu máá Moisés ní jéquin ley un, chi je ni Iyo nuū tāca jíi de.) ²³ Núu súcuan te núu cásáha ró circuncidar vēsú quivī ndétātu cúu, návāha squícu ró ley Moisés, ¿te najehē cáquitī ni rō jeē ní nasávāha ndihi ri ñn tē quivī ndétātú? ²⁴ Ma yachí cani ni rō jeē cuéchi cúu jeē sáha ri. Chi sa cani vāha ni rō siquī tācá jniñu váha. Achí yá.

Jeē ní cachi Jesús ndé nuū véji ya

²⁵ Yūcuán na te sava ñayuu ñuu Jerusalén ni caca-jnūhun jnáhan i:

¿A násūu tēe yáha cúu jeē cánanducú tēe cácujeñnu jeē cáhni de, chí naún? ²⁶ Te yāha cáhán ndijin de nuū chitú, te tú na jnūhun cácahān jíin de. ¿A sanaa te ni cacundaā ni tēe cácujeñnu jeē tēe yáha cúu Cristo jeē achí tutu jeē quiji, chí naún? ²⁷ Te tuú chi je cájini yō nuū véji tēe yáha. Te jeē quiji Cristo, chí ni ñn yó má cúni ndé chi quiji ya. Achí i.

²⁸ Yūcuán na te ni cahān jee Jesús jeē steén yā jnūhun ini templo:

Cájini rō ruhū, te cájini rō ndé ñuu vēji ri. Te vēsú súcuan te máá Yaā ndaā cúu jeē ní tají ruhū vēji ri, te tú vēji ri jeē cuní maá rí. Te tu cájini rō ndese Yaā cúu ya. ²⁹ Te máá rí chí jíni rī yā, chí nde nuū maá yá vēji ri, te máá yá ni tají ruhū, achí yá.

³⁰ Yūcuán na te ni canducú de jniñ de ya. Te ni ñn de tu ní cúu jniñ de ya, chí ná tu quee maá quivī jeē

jn# de ya. ³¹ Te cuehē ñayuu chi ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jēē quiiji? Chi cuehē ndasí jniñu jéhnū sáha ya jeē steén yā poder yā. Achí i.

Jeē ní catajǎ de policíá jeē jn# de Jesús

³² Te ni cajini tēe fariseo jeē súcuan cácahān ñayuu jnūhun ya. Te máá de jíin sūtū cácujehnū, ni catajǎ de policíá cándito templo jeē jn# de ya. ³³ Te ni cahān Jesús:

Jecu na quiví condee rī jíin ró jijnáhan ró. Yūcuán na te nuhun rī nuū Yaā ní tajǎ rúhū vēji rī. ³⁴ Te nanducú ró ruhū, te ma nánihīn rō ruhū. Chi ma cúu jinūcoo ró núū cóndee rī. Achí yá.

³⁵ Yūcuán na te máá tēe un ní cacajnūhun jnáhan de:

¿Te ndé nuū quihín tēe yáha jeē ma nánihīn yō de? ¿A quihīn de nuū jnáhan yó hebreo jeē ní cajitē núu cáyūcu ndé nación Grecia? ¿Te á steén de jnūhun nuū ñáyuu Grecia, chí naún? ³⁶ ¿Te na jnūhun cúu jeē ni cáhān de jíin yó jeē nanducú yó de te ma nánihīn yō de, chí ma cúu jinūcoo yó núū cóndee de? Achí tēe un jijnáhan de.

Siquī ndute jeē cótecu yō ní cáni sáha

³⁷ Te quiví sándihí vico ún te cúu vico cáhnu ga. Te quiví un ní ndocuiñí Jesús, te ni cahān jee ya:

Núu ndé ñáyuu jnáa ndasí i tāca jēē váha jeē sáha rī jehē i, nájñūhun jeē jichí i ndute, núu súcuan te na quiví i ndaha rī te coho i ndute, cúu jeē nihín i jeē váha ún. ³⁸ Te ñayuu jeē candíje jeē jnáma rī i, chí ini anuá i condee Espíritu Santo, te cuu ya

nájnūhun yūte cáne ñuhún jeē sáha ya jeē cótecu i ní cáni, nájnūhun cáhán tutu ñi. Achí yá.

³⁹ Te súcuan ni cahān yā jeē ñayuu candíje jeē jnáma ya i, nihīn i Espíritu Santo. Chi ná tu quee Espíritu ún, chi ná tu ndaa Jesús quinuhun yā nuū ndujéhnū ya.

Jeē ní cacusññ ñayuu siquī yā

⁴⁰ Te sava ñayuu cuehē ún, ná ni cajini sōho i jnūhun yáha, te ni cacahān i:

Jendaá jeē tée yáha cúu jeē achí tutu jeē quiji de nacani de jnūhun Yaā Dios, achí i.

⁴¹ Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chi ni cacahān i:

Tuú chi nasūú Galilea quiji Cristo. ⁴² Chi cáhán tutu ñi jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

⁴³ Te súcuan te ni cacusññ ñayuu jeē siquī yā. ⁴⁴ Te sava i cáconi i jññ i ya, te ni ññ i tu ní jññ i ya.

Jeē tu ní cáccandíje tēe cáccujéhnū

⁴⁵ Yūcuán na te policía cándito templo tu ní cájññ de Jesús, te cuanungoo de nuū tāca tée fariseo jíñ núu sutú cáccujéhnū. Te tēe ún ni cacajnūhún de policía:

¿Najehē tu ní quécoo ró jíñ de? áchí.

⁴⁶ Te ni cacahān policía un:

Tú cuiti ni ññ tēe cáhán vāha ndasí nájnūhun cáhán tēe yúcuan, áchí.

⁴⁷ Te ni cacahān tēe fariseo:

¿Te á suni nde máá ró jijnáhan ró ní stáhú de naún? ⁴⁸ Ni ññ jnáhan ruhū tēe cáccujéhnū jíñ tée fariseo, tu cáccandíje ri jnūhun cáhán tēe ún, ¿te naun

cáandíje máá ró? ⁴⁹ Te ñayuu cuehē yāhá jēē tu cájecūhun ni i ley Moisés, chi jnahnū ndetū i jeē cáandíje i tēe ún, áchí de jíjnáhan de.

⁵⁰ Te ni cahān Nicodemo, tēe ni jéhēn nuū yā ñn jecuāā, te suni ñn tēe fariseo cúu de:

⁵¹ Cáhán ley yō jeē ma cúu tee yó cuēchi siquī ñn tēe, te núu tú xīhna gā cuni sōho yó ndese cáhán de, návāha cucáhnū ni yō na cuēchi ni sáha de. Achí de.

⁵² Te ni cacahān jíin de:

Te rōhó, ¿á suni nde Galilea vēji ró jēē cahán rō jehē tēe ún? Nanducú váha ró núu tútu iī te cuni rō jeē ndé Galilea tu quénda cuiti ni ñn tēe nácani jnūhun Yaā Dios. Achí jíin de. ⁵³ Te cuanungoo de ná vehe ná vehe de.

Jnūhun ñahan ní casíquí ndéē jnáhan

8

¹ Te ni caa Jesús cuahān yā yucu Olivos. ² Te jeē cuácundijin inga quivī, te ni ndee tucu ya templo. Te ndihi ñayuu ni quecoo i nuū yā. Te ni cucōo ya, te ni steén yā jnūhun nuū i. ³ Yūcuán na te tēe cástéén tutu ley Yaā Dios jíin tēe grupo fariseo, ni quecoo de jíin ñn ñahan jeē ní canihīn de ña jeē casíquí ndéē ña. Te ni cajeni de ña mēhñú. ⁴ Te ni cacahān de jíin yá:

Maestro, ni canihīn ná ñahan yáha jēē casíquí ndéē ña. ⁵ Te ley Moisés ndácu jniñu nuū yō jeē cuáha yó yūu xinī ñahan cásáha súcuan návāha cuu ña. Te máá ní, ¿ndese cáhán ní?

⁶ Te súcuan ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi siquī yā. Te Jesús ni jīta ndeyi

ya, te ni tee ya nuū ñúhun jíin xínī ndáha ya. ⁷ Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de:

Núu ndé ñn máá ró tú na cuēchi ró, te xīhna gā maá ró cuāha yuū xinī ña núu súcuan, áchí yá.

⁸ Te ni jíta ndeyi tucu ya, te ni tee tucu ya nuū ñúhun. ⁹ Te nuū ní cajini de jeē súcuan ni cahān yā, te ni cajecūhun ni de jeē suni cáhīyo cuēchi de. Te ná ñn ná ñn de ni quendacoo de cuahān de, xīhna gā tēe jéhnu ga te nde nuū ní ndíhi na. Te ni ndōo máá ñn na Jesús jíin ñahan índichi mēhñú un. ¹⁰ Te ni ndonehen tucu ya maá yá, te tuá ni ñn tēe un ní jíto ya, chi máá na ñahan ún. Te ni cahān yā jíin ña:

¿Ndé chi cuángoo tēe cájequin cuēchi siquī rō? ¿A tú ni ñn de ní ndóna cahān gā cuēchi siquī rō?

¹¹ Te ni cahān ña:

Tú ni ñn de, áchí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuáhán te ma sáha ga rō cuēchi, áchí yá.

Jesús cúu máá luz jeē steén ini anuá ñayuu

¹² Te inga jínu ni cahān Jesús jíin ñayuu:

Máá rí cúu nájnūhun luz jeē steén ini anuá ñayuu ñayiví, jeē sáha jeē jécūhun ni i siquī Yaā Dios. Ñayuu candíje ruhū chi ma cáca i nájnūhun nuū néē, chí sa suhva coneváha i luz ini anuá i jeē sáha jeē cótecu i ní cáni.

¹³ Yūcuán na te ni cacahān tēe fariseo jíin yá:

Róhó chi cáhán rō jnūhun jehē maá ró, te tu jéjníñu jnūhun cáhán rō.

¹⁴ Te ni cahān Jesús jíin de jíjnáhan de:

Vēsú cáhán rī jehē maá rí, te íyó ndáā jnūhun cáhán rī. Chi jíní rī ndé nuū véji rí jín ndé nuū quihín rī. Te róhó tu cájini rō ndé nuū véji rí ni ndé nuū quihín rī. ¹⁵ Máá ró chi cuenta ñayuu ñayīvi cásandaā rō siquī jnūhun cáhán rī. Te ruhū chi tu sándaā mañúhún rí siquī ni ñin ñayuu. ¹⁶ Te núu sándaā rī siquī i, te ndaā sáha rí, chi tu sáha mañúhún rí, chi sándaā rī nde jín máá Tátá rī, Yaā ní tají rúhū véji rí. ¹⁷ Te yósó núu tútu ley cánevāha ró jéē núu inuú cácahān uū testigo, te jíní ñúhún cuatáhú ró jeē cácahān, chi íyó ndáā jnūhun ún. ¹⁸ Núu súcuan te ruhū cúu ñin jeē cahán ndaā rī jehē rī. Te inga jeē cahán ndaā jehē rī cúu máá Tátá rī, Yaā ní tají rúhū. Achí yá.

¹⁹ Te ni cacahān de jín yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tatá rī nuú.

²⁰ Tāca jnūhun yáha ní cahān Jesús jeē steén yā ini templo nuū cáyūcu yéjnū jeē cásocō i xūhún. Te tú ni ñin de ní jnī de ya, chi ná tu quee maá quívī jeē jnī de ya.

Jeē ni cahān yā jeē ma cúu jinūcoo de nuū cóndee yā

²¹ Te ni cahān tucu Jesús jín de:

Ruhū chi quihín rī, te nanducú ró rúhū, te ma nánihín rō ruhū, chi quendōo cuēchi ró siquī rō quívī cúu rō. Te jeē yúcuan má cúu jinūcoo ró núu quihín rī, achí yá.

²² Yūcuán na te tēe hebreo un ní cacahān maá de:

¿A cahni tēe yáha máá de, te jeē yúcuan cáhán de jeē ma cúu jinūcoo yó núū quihín de, chí naún? Achí de.

²³ Te ni cahān yā:

Máá ró jijnáhan ró chi ñayīvī yáha véjicoo ró, te ruhū chi nde andivī véji ri. Máá ró cácuu ñayuu ñayīvī yáha, te ruhū chi nasūu tēe ñayīvī yáha cúu ri. ²⁴ Jeē yúcuan ní cahān rī jeē quendōo cuēchi ró siquī rō quiivī cúu rō. Chi núu ma candíje ró jēe maá rí cúu Cristo, te quendōo nahín cuēchi ró siquī rō quiivī cúu rō. Achí yá.

²⁵ Te ni cacajnūhún de ya:

Núu súcuan ¿te ndé ñn cúu ró?

Te ni cahān yā:

Je ni cachi ri nuū rō nde xīhna ñūhún ndé ñn cúu ri. ²⁶ Te íyó cuéhē gā jnūhun cuu cahān rī jín ró te sándaā rī siquī rō. Te ma cahán rī, chi ini ñayīvī yáha cáhán rī maá-ni jnūhun jeē ní jini ri ni cahān Yaā ní tají rúhū vēji ri. Te máni jnūhun ndaā cahán yā. Achí yá.

²⁷ Te tu ní cájecūhun ni de jeē cahán yā jnūhun Tátá yā andivī jín de. ²⁸ Jeē yúcuan ní cahān gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé ñn cúu ri. Te cuni rō jeē tú na vé sáha ri jeē maá rí, chi cáhán rī maá-ni jnūhun ni steén Tátá rī nuū rī. ²⁹ Chi máá Tátá rī, Yaā ní tají rúhū, ndéé yá jín rí. Te tu stóo máñūhún yá ruhū, chi níni sáha ri jniñu jeē nújnahan ni maá yá. Achí yá.

³⁰ Te jeē ni cáhán yā jnūhun yáha, te cuehē ñayuu ni cacandíje i ya.

Siquī ndé-ni cúu sēhe Yaā Dios jín sēhe jexeén

³¹ Yūcuán na te ni cahān Jesús jíin jnáhan ñuu yā hebreo jeē ní cacandíje i ya:

Te núu cuiñi nīhin ró jíin jnúhun stéén rī nuū rō, te cuu ndije ró ñáyuu scuáha jíin rí. ³² Te jecūhun ni rō jnúhun ndaā, te jnúhun ndaā un sáha jeē nduu libre rō nuū jeē yíhi ró ndaha.

³³ Te ni cacahān i jíin yá:

Sēhe yucūn Abraham cácuu ri, te tu cáyihī cuiṭi rī ndaha ni ñn. ¿Te ndese cúu jeē cahán rō jeē nduu libre rī núu súcuan?

³⁴ Te ni cahān Jesús:

Jendaá cahán rī jíin ró jeē tāca ñáyuu casáha cuēchi, tu íyó libre i, chi yíhi i chíji cuēchi jeē jejniñu cāhá i nuū. ³⁵ Te ñayuu jejniñu cāhá, chi tu cúu i ñn jnáhan ñayuu vehe nuū jejniñu i. Te ñn sēhe chí sa suhva cúu ndije i jnáhan ñayuu vehe ún. ³⁶ Núu súcuan te máá rí jeē cúu Sēhe Yaā Dios, núu sáha ri jeē tuá cuajniñu cāhá ró nuū cuēchi, núu súcuan te nduu libre ndije ró jíjnáhan ró, te cuu ró séhe ya. ³⁷ Te jíin rī jeē séhe yucūn Abraham cácuu ró, te vēsú súcuan te cácuu rō cahni rō ruhū, chi tu cájetáhú ró jnúhun cáhán rī. ³⁸ Ruhū chi cáhán rī jnúhun jeē ni stéén Tatá rī nuū rī. Te máá ró chí cásáha ró jniñu jeē ni cáhán tatá máá ró jijnáhan ró. Achí yá.

³⁹ Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje ró nájnūhun ni candíje Abraham návaha cuu ndije ró yúcūn de, yūcuán na te jniñu váha ni sáha de suni sáha máá ró nuū. ⁴⁰ Te vijna chí cácuu rō cahni rō ruhū, vēsú ni cahán rī jíin ró tāca jnúhun ndaā ni stéén Tatá rī nuū rī. Te

Abraham chi tu ní sáha cuiti de súcuan. ⁴¹ Máá ró chi ñnuú cásáha ró jíin tátá maá ró. Achí yá jíin i.

Yūcuán na te ni cacahān i:

Máá rí chi tu cácuu ri sēhe ndáhú jēē tu tátá. Chi íyó ñn-ni tátá rī, te Yaā Dios cúu ya.

⁴² Te ni cahān Jesús:

Núu Yaā Dios cúu ndije tátá rō, te coo manī rō jíin rí nuú. Chi nde nuū Yaā Dios ni quenda ri vēji ri. Te tú vēji ri jeē cuní maá rí, chi máá yá ni tají rúhū. ⁴³ ¿Te najehē tu cájecūhun ni rō jñūhun cáhān rī núu súcuan? Suu siquī jeē tu cácuu rō chusóhó ró jñūhun nácani ri. ⁴⁴ Máá ró jijnáhan ró chi tátá rō cúu jexeén. Te cácuu rō sáha ró máá jēē cuní tátá rō ún. Máá jéxeén ni jehni ndīyī nde jeē xíhna ñhūhūn. Te tu ní íin cuiti jíin jñūhun ndaā, te tú cuiti na jñūhun ndaā cahān. Te jeē cahān jexeén jñūhun stáhú cúu jeē súcuan cáa máá. Chi máá un cúu jeē ndíso jñūhun stáhú, te máá un cúu jeē ní squéjéé ndihī jñūhun stáhú. ⁴⁵ Te ruhū chi cáhān rī jñūhun ndaā, te jeē yúcuu cúu jeē tu cácuu rō rúhū. ⁴⁶ Te ni ñn ró ma nihín rō cuēchi siquī rī, chi tú cuiti na cuēchi ri. Te máni jñūhun ndaā cahān rī, ¿te naun tu cácuu rō rúhū? ⁴⁷ Ñayuu cácuu sēhe Yaā Dios, chi cáchusóhó i jñūhun Yaā Dios. Te nasūu séhe Yaā Dios cácuu ró, te jeē yúcuu tu cácuu rō chusóhó ró. Achí yá jíin de.

Iyó Jesús nde ná tu coo Abraham

⁴⁸ Yūcuán na te ni cacahān jñáhan ñuu yā hebreo un:

Ndaā cácahān rī jeē canéé ró nájñūhun ñayuu Samaria, te ñhūhun tachī ini rō.

⁴⁹ Te ni cahān Jesús:

Tu ñúhun tachī ini rī, chi yíñúhún rí jíin Tátá rī. Te máá ró jijnáhan ró chi tu cáhīyo yíñúhún ró jíin rí. ⁵⁰ Máá rí tu ndúcú rí jeē cujéhnū ri. Iyó ñin jeē sáha jeē cujéhnū ri, te máá yá sándaā siquī jnúhun cácahān rō. ⁵¹ Jendaá cahán rī jíin ró, núu ndé ñáyuū squícu jnúhun cáhán rī, ma cúū cuiṭi i. Achí yá.

⁵² Te tēe hebreo un tu ní cájecūhun ni de, te ni cacahān de:

Vijna te ni cacucáhnu ni rī jeē ñúhun ndije tachī ini rō. Chi Abraham jíin táca tēe ni canacani jnúhun Yaā Dios nde jenahán, ni cajihī de. Te rōhó cáhán rō, núu ndé vé squícu jnúhun cáhán rō, te ma cúū cuiṭi i, áchí ró. ⁵³ ¿Te chí jéhnū ga rō vēsú jíi yō Abraham naún? Chi ni jihī de, te suni ni cajihī táca tēe ni canacani jnúhun ya. ¿Te ndé ñin ga sáha ró máá ró núu súcuan? Achí de.

⁵⁴ Te ni cahān Jesús:

Núu ruhū sajehnū ri maá rí, te tu níhín jníñu. Máá Tátá rī cúu jeē sajehnū ruhū. Te cácahān rō jeē maá yá cúu Yaā Dios maá ró. ⁵⁵ Te vēsú súcuan te tu cájini rō ndese Yaā cúu ya. Te ruhū chi jíin rī yā. Te núu cahān rī jeē tu jíin rī yā, te cuu ri tēe stáhú nájnūhun máá ró jijnáhan ró. Te tuú chi jíin ndije ri yā, te squícu ri jnúhun cáhán yā. ⁵⁶ Te jíi rō Abraham ni cusī ni de jeē coto de quivī quéē rī. Te je ni jito de, te ni jito ri jeē ní cusī ndasí ni de. Achí yá.

⁵⁷ Yūcuán na te ni cacahān tēe hebreo un jíin yá:

Ni ná tu coo ró uū xico uxī cuiyā, ¿te ndese cúu jeē cahán rō jeē ní jito ró núu Abraham? achí de.

⁵⁸ Te ni cahān Jesús:

Jendaá cahán rī jíin ró jeē nde ná tu cacu Abraham te je iyó rí, achí yá.

⁵⁹ Yūcuán na te ni caquihin de yuū jeē cuáha de xinī yā. Te Jesús chi ni quenda sāhi yá ni yāha ya mēhñú de, ni quenda ya ini templo cuahān yā.

Jeē ní nasávāha ya ñn tēe ni cacu cuáá

9

¹ Te jeē jíca Jesús cuahān yā, te ni jito ya nuū ñn tēe ni cacu cuáá. ² Te tēe cáscuáha jíin yá ni cacajnūhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máá de cúu, chí naún?

³ Te ni cahān Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuan, chi sa suhva návāha cuni ñayuu jniñu jéhnú sáha Yaā Dios jíin de.

⁴ Níní jéē cúu nájñūhun nduú ini ñayiví, te cánuú sáha rí jniñu Yaā ní tají rúhū. Chi quee tiempo jeē coo nájñūhun jecuáá, jeē tuá cuu sájñiñu ni ñn.

⁵ Níní jéē iyó rí ini ñayiví te cúu rí luz jeē cúndijin ini anuá ñayuu ñayiví, návāha jecūhun ni i siquī Yaā Dios. Achí yá.

⁶ Te ná ni cahān yā súcuan, te ni tesīhi yá nuū ñūhun, te ni sáha ya ndehyū jíin tésīhi yá un, te ni tee ya siquī tñūu tēe cuáá un. ⁷ Te ni cahān yā jíin de:

Cuáhán núū pila Siloé te nacate ró tñūu ró, achí yá. Te jñūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tñūú de, te ni ndundijin-ni, te ni nandicó de vēji de.

⁸Yūcuán na te ñayuu yúcu yajni jíin de, jíin ñáyuu jeē ní cajito jeē cúu de tēe cuáá, ni cacajñūhun jnáhan i:

¿A násūu tēe yáha cúu jeē ndeé-ni yáhá te jícán caridad?

⁹Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máá de chi ni cahān de:

Suu ri cúu.

¹⁰Yūcuán na te ni cacajñūhún i de:

¿Te ndese cúu jeē ní nanune tinūu ró núu súcuan?

¹¹Te ni cahān de:

Tēe nání Jesús ni sáha de ndehyū, te ni tee de tinūu rí, te ni cahān de jíin rí: Cuáhán núu pila Siloé te nacate ró tñūu ró. Te ni jehēn rī, te ni nacate ri, te ni nanune-ni tinūu rí, achí de.

¹²Yūcuán na te ni cacajñūhún i de:

¿Ndé nuū íne tēe ún? áchí i.

Tu jíiní rī, achí de.

Jeē ní castíchí tēe fariseo tēe ni cacu cuáá

¹³Yūcuán na te ni cajendeca i tēe ni iyo cuáá un núu tēe grupo fariseo. ¹⁴Te quiivī ndétātu cúu jeē ni sáha Jesús ndehyū jeē ní nanune ya tinūú de. ¹⁵Te tēe fariseo un ní cacajñūhún tucu de tēe ún ndese ni nanune tinūú de. Te ni cahān de:

Ni tee de ndehyū siquī tinūu ná, te ni nacate ná, te ni ndundijin-ni tinūu ná, achí de.

¹⁶Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chi tu née iī de quiivī ndétátú.

Te sava ga de chi ni cacahān:

¿Ndese cuu sáha tēe un táca jniñu jéhnú yáha te núu tēe íyó cuéchi cúu de?

Te ni cacusín de siquī yā. ¹⁷ Te ni cacajnūhún tucu de tēe ni íyo cuáá un:

Róhó, ¿ndese cáhán rō siquī tēe ni nanune tññūu ró núu súcuan?

Te máá de ni cahān de:

Íñ tēe nácani jññhun Yaā Dios cúu de, áchí de.

¹⁸ Te tēe hebreo un chi tu ní cá candíje de jeē ni íyo cuáá tēe ún te ni ndundijin tññūu de. Te ni cacana xinī tatá de náná de. ¹⁹ Te ni cacajnūhún de:

¿A yáha cúu sēhe ro jeē ní cacu cuáá cácahān rō? Núu súcuan ¿te ndese ni ndundijin tññūu de vijna? áchí.

²⁰ Te ni cacahān tatá de náná de:

Suu sēhe rí cúu tēe yáha jeē ní cacu cuáá. ²¹ Te tu cájini rī ndese ni ndundijin tññūu de vijna, ni tu cájini rī ndé tēe ni nanune tññūu de. Cajññhun ró máá de, chi je jéhnú de, te na cáchi máá de.

²² Súcuan ni cacahān tatá de náná de, chi cáyūhú de cájito de jññhan de tēe hebreo. Chi je ni casándaā tēe un jeē núu ndé ñáyuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quīvi i ini vehe ñ sinagoga. ²³ Jeē yúcuán ní cacahān tatá de náná de: Cajññhun ró máá de, chi je jéhnú de.

²⁴ Yūcuán na te tēe hebreo un ní cacana tucu de tēe ni íyo cuáá un. Te ni cacahān de jín:

Cachi cají ró nuū rī, jító jínúu Yaā Dios. Chi cájini rī jeē tēe íyó cuéchi cúu tēe ni nanune tññūu ró.

²⁵ Yūcuán na te ni cahān de:

Tu jíní na núu íyó cuéchi de, chí naún. Te íyó ññ jeē jíní ná, cúu jeē tēe cuáá ní cuu ná, te vijna chi ni ndundijin tññūu ná. Achí de.

26 Te ni cacajñuhún tucu de:

¿Ndese ni sáha de jíin ró? ¿Ndese ni nanune de tinūu ró núu súcuan?

27 Te ni cahān de:

Je ni cuu ni castūhun ná nuū ní, te tu ní cáconi ní cuatáhú ní. ¿Te najehē cáconi ni jēē cáchi tucu ná núu ní? ¿Te chí suni cáconi ni jíináhan ní candíje ní yá naún?

28 Yūcuán na te ni cacahān neé jíin de, te áchí:

Máá ró chi cándíje ró téē ún, te máá rí chi cácdíje ri Moisés. 29 Te cájini rī jeē ni cáhān Yaā Dios jíin Moisés. Te tēe yúcuan, ni tu cájini rī ndé nuū véji de.

30 Te ni cahān tēe ni īyo cuáá:

Nāa ni na jēē cácahān ni jēē tu cájini ní jeē véji de nuū Yaā Dios, vēsú ni nanune de tinūu ná. 31 Te cájini yō jeē Yaā Dios tu jíini nahín yá jeē cájicān ñayuu iyó cuéchi. Chí jíini nahín yá nuū maá-ni ñayuu jeē cáchiñuhún i ya te cásáha i jeē cuní yā.

32 Te ní véji yó te tu ní jíini sōho cuítī yō jeē ñn tēe nanune de tinūú inga tēe ni cacu cuáá. 33 Te núu nasūu ndé nuū Yaā Dios véji tēe ún, te ma cúu cuítī sáha de ñn jniñu súcuan. Achí de.

34 Te ni cacahān tēe hebreo un:

Róhó chí íyó ndasí cuéchi ró ndé quiṽī ní cacu ró, ¿te á máá ró steén nuū rī naún? áchí.

Te ni caquenehen tēe un yátā vehe ñ sinagoga.

Siquī ñayuu cáhīyo cuáá ánuá

35 Te ni jíini jñuhun Jesús jeē ní caquenehen de tēe ún. Te ni nihín jnáhan ya jíin de, te ni cahān yā jíin de:

¿A cándíje ró Séhe Yaā Dios?

36 Te ni cahān de:

¿Ndé ñn cúu ya návāha candíje ná yá?

³⁷ Te ni cahān Jesús:

Je ni jito ró núū yā, te suu cúu ruhū jeē cahān jíin ró, achí yá.

³⁸ Yūcuán na te ni jecuiñī yití de nuū yā, te ni cahān de:

Cándíje ná jēē nihín cúu Jitoho ná.

³⁹ Te ni cahān Jesús:

Vēji ri ini ñayiví yáha jēē sándaā rī siquī ñáyuu. Chi ñayuu jeē nájñūhun cácuáá ánuá, ndundijin ini anuá i jeē jécūhun ni i siquī rī. Te ñayuu jeē jéni ni i jeē cájecūhun ni i, nájñūhun nducuáá ánuá i. Achí yá.

⁴⁰ Te sava tēe fariseo jeē cáhīin jíin yá, ná ni cajini de jñūhun yáha, te ni cacahān de jíin yá:

¿Te chí jéni ni rō jeē suni tēe tu cájecūhun ni cácuu máá rí naún?

⁴¹ Te ni cahān Jesús:

Núu jeē cácuu ró tēe tu jécūhun ni nuú, te ma cóo cuēchi ró. Te siquī jeē ní cacahān rō jeē cájecūhun ni rō, te tu cájetáhú ró, jeē yúcuan condee cuēchi siquī rō.

Jñūhun yátá siquī lanchi

10

¹ Jendaá cahān rī jíin ró, núu yñhi lanchi ini corral cánevāha cáhnu ñayuu, te núu ndé tēe tu quíví de ichi yéhyí corral un, chi sa suhva ñnga lado cáa de quíví de, tēe un cúu ñacuñná, chi vēji jeē sacuñná. ² Te tēe quíví ichi yéhyí, chi tēe un cúu pastor ndító lanchi. ³ Te tēe ndító yéhyí, núne de te quíví tēe ún. Te lanchi de cánacuni tī tachī de. Te cána de sñhví lanchi máá de, te táva de ti. ⁴ Te núu

ni tava de ndihī lanchi máá de, te yósnúu de nuū tī cuahān de. Te lanchi un cándiquīn tī de, chi nácuni tī tachī de. ⁵ Te ma cóndiquīn tī yatā inga tēe, chi sa suhva cunu ti coto ti de, chi nácuni tī jeē nasūu jítoho tī cúu.

⁶ Jnūhun yátá yáha ní cahān Jesús jíin ñáyuu, te tu ní cájecūhun ni i na jnūhun cúu jeē ni cáhān yā.

Jesús cúu máá pastor vāha

⁷ Yūcuán na te ni cahān gā Jesús jíin i:

Jendaá cahán rī jíin ró: Máá rí cúu nájñūhun yéhyí corral nuū quívicoo ñayuu cácuu nájñūhun lanchi ri. ⁸ Tāca tēe jeē tu ní tájí Yāā Dios, jeē ní quijicoo de nde ná tu quee rī, cácuu de nájñūhun ñacuīhná, chi tu ní cástéén de jñūhun ndaā. Te ñayuu cácuu nájñūhun lanchi ri, tu ní cájetáhú i de. ⁹ Máá rí cúu nájñūhun yéhyí. Te ñayuu jeē jíin máá rí quívicoo, jnama ri i. Te cuu i nájñūhun lanchi jeē ndívicoo ti nuū yíhi vāha ti, te quéndacoo ti nuū cáji vāha ti.

¹⁰ 'Tēe cuíhná chi máni vēji de jeē sacuíhná de lanchi, te cahni de, te snāā de. Te ruhū chi vēji ri návāha cotecu ñayuu cácuu lanchi ri, te nde yōhyo vāha ndetū coo i. ¹¹ Máá rí cúu máá pastor vāha. Te pastor vāha chi ndító vāha de lanchi de, vésú nde cuu de jeē siquí tī. ¹² Te ñin tēe yíyāhu, nasūú pastor tī cúu de, chi nasūú lanchi máá de cúu ti. Te núu jíto de jeē véji yihī, te stóo de lanchi, te jínu de cuahān de. Te yihī chi jñí ti lanchi, te sáha ti jeē jité núu lanchi. ¹³ Te tēe yíyāhu ún chi jínu de cuahān de siquí jeē lanchi tátú cúu jeē ndító de, te jeē yúcuan tu cúndáhú ni de ti.

14 'Máá rí cúu máá pastor vāha. Te jíní rī tāca ñayuu cácuu nájnūhun lanchi ri, te máá i cájini i ruhū. 15 Te yāha cúu nájnūhun jeē Tatá rī jini yā ruhū, te máá rí jini rī Tatá rī. Te cuu rī jeē siquí ñayuu cácuu lanchi ri. 16 Te suni íyó gá ñayuu jeē cácuu lanchi ri, te sún sún ñayuu cácuu i. Te cánuú jéē suni condeca ri ñayuu ún. Te cuatáhú i jnūhun cáhán rī. Te coyūcu cáhnu-ni ndihi ñayuu candíje, te coo in-ni pastor i.

17 'Te Tatá rī manī ndasí yá jín rí siquí jeē jéhe ri maá rí jeē cúu rī jehē ñayuu, te natecu tucu ri. 18 Ni in ma cúu cahni ruhū, chi máá rí cúu jeē jéhe jnūhun cuu rī. Jeē cachí máá rí te cuu rī, te jeē cachí máá rí te natecu rī, chi súcuan íyó poder rī. Súcuan ni cahán Tatá rī jeē sáha ri. Achí yá.

19 Te jeē ní cajini jnáhan ñuu yā hebreo jnūhun yáha, te ni cacusín tucu i. 20 Te cuehē i ni cacahān: ¿Naun cáchusóhó ró jeē cahán de? Chi ñúhun tachī ini de, te ni tiví xíní de.

21 Te sava ga i ni cacahān:

Tu súcuan cáhán tēe ñúhun tachī ini, nájnūhun cáhán tēe yáha. Te tēe ñúhun tachī ini, ¿á cuu nanune de tinūu tēe cuáá naún? Achí.

Jeē ní casquéhichī i Jesús

22 Te tiempo míjin cúu, te ñuu Jerusalén cánasáha ñayuu víco jeē cánucūhun ni i quiví ní cuhī templo cáhnu. 23 Te jíca cuu Jesús ini templo, ini corredor jeē naní Salomón. 24 Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quiví sáha ró jéē ma cucáhnu ni rī? Cachi cají núu rī jijnáhan ri núu máá ró cúu Cristo.

25 Te ni cahán Jesús:

Je ni castūhun rí nuū rō, te tu ní cá candíje ró. Tācá jniñu jeē ní tejníñu Tátá rī ruhū sáha ri, yūcuan stéén cají jeē maá yá ni tají rúhū. ²⁶ Te tu cá candíje ró, chí nasūú lanchi ri cácuu ró, nájnūhun je ni cahān rī jíin ró. ²⁷ Ñayuu cácuu lanchi ri, chí nácuni i jeē maá rí cúu jeē cahán jíin i. Te jíin rī i, te cándiquīn i ruhū. ²⁸ Te cotecu i ní cáni sáha ri, te ma jnahnú ndetū cuiti i. Te ni ñn ma cúu quende i ndaha ri. ²⁹ Máá Tátá rī ni squívi ya i ndaha ri. Te cújéhnū ga maá yá vésú tāca gá. Te ni ñn ma cúu quende i ndaha ya. ³⁰ Máá rí jíin Tátá rī, chí ñn-ni cúu ri, achí yá.

³¹ Yūcuán na te jnāhan ñuu yā hebreo ni caquihin tucu de yuū jeē cuáha de xinī yā. ³² Te ni cahān yā jíin de:

Ni steén rī cuehē jniñu váha nuū rō jeē ni sáha ri jíin poder Tátá rī. ¿Te á síquī jeē ni sáha ri jniñu váha cúu jeē cuáha ró yúu xinī rī núu súcuan? Achí yá.

³³ Te ni cacahān de jíin yá:

Nasūu síquī jeē ni sáha ró jniñu váha cúu jeē cuáha ri yuū xinī rō, chí síquī jeē cahán ndevāha ró jéé achí ró jeē ñnuú cúu ró jíin Yaā Dios. Chí tē-ni cúu ró, te sáha ró jéé ñnuú cúu ró jíin Yaā Dios. Achí de jíin yá.

³⁴ Te ni cahān Jesús:

Yósó núu tútu ley cánevāha ró jéé ni cáhān Yaā Dios: Nájnūhun yaā cácuu ró, achí Yaā Dios, achí tutu. ³⁵ Chí ñayuu jeē ní cajetáhú jnúhun ya, ni cahān yā jeē cácuu i nájnūhun yaā. Te cájini yō jeē ma cúu cahān yō jeē tú ndaā jnúhun cáhān tutu i. ³⁶ Núu súcuan ¿te naun cácahān rō jeē jnúhun

ndevāha cúu jeē ni cáhān rī jeē Séhe Yaā Dios cúu ri? Chi máá Yaā Dios ni jeni ya ruhū síquī jniñu iī, te ni tají yá ruhū vēji ri ini ñayīví. ³⁷ Núu tu sáha ri jniñu sáha Tátá rī, núu súcuan te ma candíje ró rúhū. ³⁸ Te núu sáha ri, te vēsú tu cácandíje ró rúhū, te na cándíje ró síquī jniñu sáha ri ún. Te súcuan te cucáhnu ní rō jeē ñn-ni cúu Tátá rī jíin rí, te ñn-ni cúu ri jíin Tátá rī. Achí yá.

³⁹ Yūcuán na te cánducú tucu de jni de ya. Te ni ndoñúhún-ni ya cuahān yā.

⁴⁰ Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán. ⁴¹ Te ni quijicoo cuehē ñayuu nuū yā, te ni cacahān i jíin táca jnáhan i:

Ndaā chi vēsú tu ní sáha Juan ni ñn jniñu jéhnú, te ni cundaā ndíhi jnūhun ní cahān de síquī ndese sáha tēe yáha. Achí i.

⁴² Te cuehē ñayuu jeē ni jéngoo nuū yā yūcuán, ni cacandíje i ya.

Jeē ni jíhī Lázaro

11

¹ Te ni íyo ñn tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betania. ² Te María un jéē cúu cuáha Lázaro, suu ña cúu jeē ní chihi aceite perfume jehē Jitoho yō, te ni nasíchí ña jíin ixi xíní ña. ³ Te ndíndúú cuáha de un ní catajái ña jnūhun cuahān nuū Jesús:

Tēe jeē maní ni jíin, cúhú de, áchí ña, áchí mozo.

⁴ Te ná ni jini Jesús jnūhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese

cújéhnū ya. Chi ruhū, Sēhe Yaā Dios, jín cuéhyī yáha te stéén rī jeē suni cújéhnū máá rí. Achí yá.

⁵ Te manī Jesús jín Marta jín cūhū ña jín Lázaro.

⁶ Te vēsú súcuan te nuū ni níhīn yā jnūhun jeē cuhú de, te ni quendōo ya uū gā quivī nuū ndeé yá un.

⁷ Yūcuán na te ni cahān yā jín tée cáscuáha jín yá:
Na quíhīn tucu yó región Judea.

⁸ Te tēe cáscuáha un ní cacahān de jín yá:

Maestro, ná tu cuu quivī jeē ní canducú jnáhan yó hebreo cuāha de yuū xinī ní. ¿Te cúní ni quíhīn tucu ní yúcuan naún? Achí de.

⁹ Te ni cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayivī yáha cúu nájnūhun jeē iyó úxī uū hora ñn nduú. Te jeē sáha ri jeē cuní Yaā Dios, cúu ri nájnūhun tēe jeē jíca nduú, te tu cáchihi de jehē de, chi cúndijin nuū de ñayivī yáha.

¹⁰ Te tēe jeē tu sáha jeē cuní Yaā Dios, chi nájnūhun jíca de jecuāā, te nájnūhun cáchihi de jehē de, chi tu cúndijin ini anuá de. Achí yá.

¹¹ Yūcuán na te ni cahān tucu ya:

Amigo yō Lázaro quíxí de, te quíhīn rī sáha ri jeē nátahū ni de. Achí yá.

¹² Yūcuán na te tēe cáscuáha un ní cacahān de:
Núu quíxí de te jíní yō jeē nduvāha de.

¹³ Te Jesús chi súcuan ni cahān yā jeē jé ni jihī de. Te cájeni ni tēe cáscuáha jeē quíxí ndije de.

¹⁴ Yūcuán na te ni cahān cají yá:

Je ni jihī Lázaro. ¹⁵ Te cúshī ni rī jeē tu ní cóyūcu yó yūcuán, návāha vāha ga candíje ró jēe coto ró jniñu jéhnū sáha ri. Núu súcuan te na quíngoo yó núū ndíyī ún. Achí yá.

16 Yūcuán na te Tomás, tēe cúu cuátí, ni cahān de jíin jnáhan de jeē cascuáha jíin yá:

Suni na quíngoo yó návāha cuu yō jíin yá, achí de.

Jesús cúu jeē sáha jeē nátecu te cotecu ní cáni

17 Te nuū ní quee Jesús, te jíin yā jeē ní cuu cuūn quivī yíndūji Lázaro. 18 Te yajni-ni íne ñuu Betania jíin ñuu Jerusalén, nájnuhun uū kilómetro yosáva.

19 Te Marta jíin María, ni quecoo cuehē jnáhan ña hebreo jeē cahán i jnúhun ndeyí ni jíin ña jeē síquí jeē ni jíin cuāha ña. 20 Te nuū ní jíin Marta jeē véji Jesús, te ni quenda ña cuajnahān ña ya. Te María chi ni ndōo ña vehe. 21 Te ni cahān Marta jíin Jesús:

Núu ní íyo ní yáha, te ma cúu cuāha ná núu. 22 Te vēsú súcuan te jíin na jéē tāca jéē cacán ni núu Yaā Dios, te sáha ya, achí ña.

23 Te ni cahān Jesús jíin ña:

Natecu cuāha ró.

24 Te ni cahān Marta:

Jíin na jéē nátecu de quivī nátecu tāca ndíyí nde quivī jíin ñayiví.

25 Te ni cahān Jesús:

Máa rí cúu Yaā sáha jeē nátecu jíin jéē cótecu ní cáni. Ñayuu candíje jeē jnáma ri i, vēsú na cúu i, te natecu i. 26 Te ñayuu cátecu te cándíje i ruhū, cotecu i ní cáni andiví. ¿A cándíje ró jnúhun yáha? Achí yá.

27 Te ni cahān ña:

Cándíje ná jéē maá ní cúu Cristo, Sēhe Yaā Dios, jeē achí tutu jeē quíji ini ñayiví, achí ña.

Jeē ni ndáhyū Jesús nuū yíndūji Lázaro

28 Te ná ni cahān ña súcuan, te cuahān-ni ña, cuacana yuhu ña cuhū ña María:

Máa Maestro ni quee yā, te cána ya rohó, achí ña.

29 Te jeē ní jini María jnūhun yáha, te yachī ni ndocuñī ña, cuahān ña nuū yā. 30 Te ná tu quivī Jesús ñuu, chi ni ndōo-ni ya nuū ni jéjnahan Marta yā. 31 Te ñayuu hebreo un jēē cáyūcú ini vehe jíin María, jeē cácahān i jnūhun ndeyí ni jíin ña, ni cajito i jeē yachí ni ndocuñī ña cuahān ña. Te ni candiquñ i ña cuangoo i, chi cájeni ni i jeē cuándahyū ña nde nuū yíndūji ndīyí.

32 Yūcuán na te ni jinū María nuū íne Jesús, te ni jecuñī yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núú, áchí ña.

33 Te ni jito Jesús jeē ndahyú ña jíin jēē cándahyū ñayuu vējicoo jíin ña. Te yōhyo ni nducuñyá ni yā, te ni jnahuhū ni yā jeē cundáhú ni yā i. 34 Te ni cajnūhun yá ña:

¿Ndé mí ní cachindūji ró de?

Te ni cacahān ña jíin yá:

Quíhín yō te cuni ní, áchí ña.

35 Te ni ndahyū Jesús. 36 Yūcuán na te ni cacahān ñayuu hebreo un:

Condēhe náa yōhyo manī de jíin ndíyí ún.

37 Te sava i chi ni cacahān i:

Tēe yáha jēē ní nanune de tinūu téē cuáá, ¿á tu ní cúu sáha de jeē ma cúu Lázaro núú? áchí i.

Jeē ní natecu Lázaro

38 Te yōhyo ni jnahuhū ni tucu Jesús, te ni quee yā nde nuū yíndūji ndīyí. Te ñn yaū cava cúu, te yuyáú un ndíhyú ñn yuū. 39 Te ni cahān yā:

Tejiyo yuū un jíjnáhan ró, áchí yá.

Te Marta, cuāha ndīyí un, ní cahān ña:

Je jéén xicō de, chi je ni cuu cuūn quivī yíndūji de.

⁴⁰ Te ni cahān Jesús jíin ña:

¿A násūú je ni cahān rī jíin ró jeē núu candíje ró te coto ró jéē yóhoyo cújéhnū Yaā Dios jíin poder yā? achí yá.

⁴¹ Yūcuán na te ni catejiyo i yuū jeē ndés; yuyáú ndīyí ún. Te ni ndacoto-ni Jesús ichi ándiví, te ni cahān yā:

Tátā, na cútahū na núū ni jéē sáha ní jéē jicán na.

⁴² Te jíiní na jéē niní sáha ní jéē jicán na. Te jeē váha ñayuu cáhīn yáha cúu jeē súcuan cáhán na, návāha na cándíje i jeē maá ní ni tají sáña.

⁴³ Te ná ni cahān yā súcuan, te ni cahān jee ya:

Lázaro, quenda quiji ró, áchí yá.

⁴⁴ Te ni quenda-ni tēe ni jihī ún, te ñúsúcún ndaha de sīhīn de jíin tira sahma. Te nuū de ñúsúcún ñn sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

*Jeē ní casquíjnáhan de jnūhun jeē cáhni de Jesús
(Mt. 26.1-5; Mr. 14.1-2; Lc. 22.1-2)*

⁴⁵ Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chi ni cajito i jniñu ni sáha ya. ⁴⁶ Te sava i chi cuango i nuū tēe grupo fariseo, te ni cacastūhún i ndese ni sáha Jesús. ⁴⁷ Yūcuán na te tēe fariseo un jíin sūtū cácujehnū ni candutútú de junta jíin táca gá tēe cácujehnū. Te ni cacahān de:

¿Ndese sáha yó? Chi tēe ún yóhoyo cuehē jniñu jéhnū sáha de. ⁴⁸ Te núu condēhé-ni yó, te ndivii ñayuu candíje i de. Te quijicoo táca tēe nación Roma

jeē cácujuhnu, te canu de templo cáhnu yó, te scuíté núu de ñayuu nación yō, achí de jíjnáhan de.

⁴⁹ Te ñn jnáhan de jeē naní Caifás, jeē cúu máá sūtū cujéhnu ga cuiyā ún, ni cahān de:

Róhó chí tu cájini cuiṭi rō, ⁵⁰ ni tu cájecūhun ni rō jeē váha ga jeē cúū ñn tēe jehē ñayuu nación yō vēsú jeē náā ndivii i, áchí de.

⁵¹ Te tu ní cáhán de jnūhun yáha jéē jéni ni maá de. Chí siquī jeē cúu de sutū cujéhnu ga cuiyā ún, te ni sáha Yaā Dios jíin de jeē ní nacani de jnūhun jeē cúū Jesús jehē ñayuu nación hebreo. ⁵² Te nasūu máá ñn-ni jehē nación hebreo, chí suni jehē ndivii ñayuu cácuu sēhe Yaā Dios jeē ní cajitē núu tācá nación, návāha ñn na cuu i jíjnáhan i. ⁵³ Yūcuán na te nde quivī ún te tāca tēe hebreo cácujuhnu un, ní casquíjnáhan de jnūhun jeē cáhni de Jesús.

⁵⁴ Jeē yūcuan tuá ní jíca ndijin yā nuū jnáhan ñuu yā hebreo un, chí ni quenda ya región Judea, te cuahān yā ñn ñuu naní Efraín, nuū iyó yajni ñuhun téhé. Te ni condee yā yūcuan jíin tēe cácuáha jíin yá.

⁵⁵ Te ni cuyajni vico pascua jeē cánasáha ñayuu hebreo. Te cuehē ñayuu tācá ñuu yūcuán cuángoo i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáá te quejéé vico pascua. ⁵⁶ Te cánanducú i Jesús, te cácajnūhun jnáhan i ini templo:

¿Ndese cájeni ni rō? ¿A quiji de vico, chí tuú? Achí i.

⁵⁷ Te sutū cácujuhnu jíin tēe fariseo ni candacu de jniñu jeē núu ndé ñn ñayuu jiní ndé nuū íne ya, te na cástūhún i, návāha jnñ de ya.

*Jeē ní chuhun María perfume jehē Jesús
(Mt. 26.6-13; Mr. 14.3-9)*

12

¹ Te cúmanī iñū gā quiṽi te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ni nastécu yā de. ² Te ni casáha i ñn vico xíni jeē yiñúhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñayuu. ³ Yūcuán na te María ni quee ña jíin nájñuhun sava litro aceite perfume jeē máni ita nardo cúu, te yōhyo yahu ndeé. Te ni chuhun ña jehē Jesús, te ni nasíchí ña jíin ixi ña. Te ní ini vehe un ní chitú xicō perfume un. ⁴ Yūcuán na te ni cahān Judas Iscariote sēhe Simón, ñn tēe scuáha jíin yá un, te suu de cúu jeē nastúu de ya:

⁵ ¿Najehē tu ní cúyāhu perfume yáha jéē uní ciento denario, te cuāha yó núū ñáyuu ndahú núú. Achí de.

⁶ Súcuan ni cahān de, nasūu jéē cundáhú ndije ni de ñayuu ndahú, chi sa suhva jeē cúu de tēe cuíhná. Chi máá de ndíso yijni xūhún, te quihin cuíhná de jeē cájequin táca tēe ún. ⁷ Yūcuán na te ni cahān Jesús:

Ma stáhān rō ña. Chi jeē ni sáha ña yāhá cúu jeē ni sátūhva ña ruhū nde quiṽi jeē quíndūji ri. ⁸ Chi níni cáyūcu ñáyuu ndahú jíin ró, te ruhū chi tuá condee rī jíin ró. Achí yá.

Jeē ní casquínáhan de jñuhun jeē cahni de Lázaro

⁹ Te cuehē ñayuu hebreo ni cajini jñuhun i jeē néne ya ñuu Betania. Te ni jinūcoo i, te nasūu máá ñn jeē cuní i coto i nuū Jesús, chi suni jeē cuní i coto

i nuū Lázaro, tēe jeē ní nastécu yā. ¹⁰ Yūcuán na te sutū cácujuhnu ní casquínáhan de jnūhun jeē suni cahni de Lázaro. ¹¹ Chi jeē síquí Lázaro te ní cujiyo cuehē jnáhan ñuu de hebreo nuū de, te cá candíje i Jesús.

Jeē ni quívi Jesús Jerusalén

(Mt. 21.1-11; Mr. 11.1-11; Lc. 19.28-40)

¹² Te inga quívi ún, te ñayuu cuehē jeē ní quecoo vico pascua un, ní cajini jnūhun i jeē véji Jesús ñuu Jerusalén. ¹³ Te ni cajehnde i ndaha ñúú, te ni quendacoo i cuajnahán i ya. Te cácana jee i:

Yōhyo cújéhnú Yaā Dios. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. Yōhyo vāha Yaā cúu Rey nación yō Israel. Achí i.

¹⁴ Te ni nihin Jesús in burro, te ni jecosō yā tī, nájnūhun cáhán tutu i:

¹⁵ Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō,

te yósó yá in burro.

Achí tutu.

¹⁶ Te quívi ún te tēe cáscuáha jíin yá, tu ní cájecūhun ni de jeē súcuan squícu tāca jéē yosó núu tútu i. Te nde ná ni ndujéhnú Jesús jeē cuánuhun yā andívi, te sáá te ni canucūhun ni de tāca jnūhun yósó síquí yā, jíin jéē ní casáha de súcuan jíin yá.

¹⁷ Te ñayuu ní cahin jíin yá ná ni cana ya xiní Lázaro nuū ní yindūji de, te ni nastécu yā de, ni canacani i jnūhun ndese ni sáha ya. ¹⁸ Jeē yúcuán ní quendacoo ñayuu cuehē un, ní jejnahan i ya, chi ni cajini jnūhun i jeē ni sáha ya jniñu jéhnú un jéē ni

steén yā poder yā. ¹⁹ Yūcuán na te ni cacahān maá téé fariseo:

Vijna te je ni cajito yó jéē ma cúu cuiṭi gā casi yō. Chi jíto yó jéē ndivii cuiṭi ñayuu cuangoo i jíin de. Achí de jíjnáhan de.

Ñayuu nación Grecia nánducú i Jesús

²⁰ Te sava ñayuu nación Grecia, suni ni quijicoo i ñuu Jerusalén vico pascua un jéē chiñúhún i Yaā Dios. ²¹ Te ni quecoo i nuū Felipe, tēe ñuu Betsaida ndañú Galilea. Te ni cacahān i jíin de:

Tátā, cáconi ná cahān na jíin Jesús, achí i.

²² Te ni jehēn Felipe, ni castúhún de nuū Andrés. Te ndindúú de cuacastúhún de nuū Jesús. ²³ Te ni cahān Jesús jíin de:

Je ni quee quivī jeē ndujéhu Yaā ní nduu tēe. ²⁴ Te jendaá cahán rī jíin ró, ñn nunī trigo núu tú ñingava nuū ñúhun te quindūji, núu súcuan te quendōo máá ñn-ni. Te núu quindūji, te nacayā cuehē ndasí. Te suni súcuan cánuú cuu rī quindūji rī, návāha coo cuehē ñayuu jeē ndúu i sēhe Yaā Dios. ²⁵ Te na-ni ñayuu núu tu jéhe i jnūhun ndoho i jeē siquí ruhū, te jnahnū ndetū i. Te ñayuu jeē jéhe i jnūhun ndoho i jeē siquí ruhū ini ñayivī yáha, cotecu i ní cáni andiví. ²⁶ Núu ndé ñáyuu cuní i cuajníñu i nuū rī, na cóndiquñ i ruhū. Te nuū cóndee rī, suni yūcuán condee ñayuu jejniñu nuū rī. Te ñayuu jejniñu nuū rī, chi sáha Tátá rī jeē kujéhu i.

Jeē ni cáhān Jesús jeē cuu yā

²⁷ Te vijna te cúcuíhyá ndasí ni rī sáha jnūndóho quiji siquí rī. ¿Te ndese cahān rī? ¿A cáhān rī jíin Tátá rī: Jnama ní sáña núu jnūndóho jeē quíji siquí

ná, achi rī? Ma cúu, chi jeē siquí yúcuán cúu jeē véji ri. ²⁸ Tátā, steén ni jéē cujéhnū ndasí ní jíín poder ni, áchí yá.

Yūcuán na te ichi ándiví ní cahān ĩn jnūhun:

Je ni steén rī jeē cujéhnū ri, te sáha tucu ri ĩnga jíínu, áchí yá.

²⁹ Te ni cajini ñayuu cáhĭin yūcuán, te ni cacahān i jeē taja cáhán. Te sava ga i ni cacahān:

ĭn ndajéhé Yaā Dios ni cahān jíín yá.

³⁰ Te ni cahān Jesús jíín i:

Tu ní cáhán jnūhun yáha jéē siquí ruhū, chi sa suhva návāha cuni rō siquí jnūhun jeē ni cáhán yā jíín rí. ³¹ Vijna cúu jeē sándaā Yaā Dios siquí cuéchi ñayuu ñayiví yáha. Vijna cúu jeē scúnu ya jexeén jeē ndácu jniñū ini ñayiví yáha. ³² Te ruhū, núu na jíínu condita caa ri cuu rī ini ñayiví, te sáha ri jeē jnāā tāca ñayuu quivícoo i ndaha ri, achí yá.

³³ Súcuan ni cahān yā jeē steén yā ndese modo cuu yā. ³⁴ Te ni cacahān ñayuu jíín yá:

Ni cajini sōho ná jéē cahán tutu ley Yaā Dios cánevāha yó, jeē Cristo cotecu yā ní cáni. ¿Te naun cáhán ni jéē Yaā ní nduu tēe, cánuú condita caa ya cuu yā? ¿Ndé ĩn cúu máá Yáā ní nduu tēe núu súcuan? Achí i.

³⁵ Yūcuán na te ni cahān Jesús:

Máá jecu na quiví condee rī jíín ró jeē cúu ri luz cundijín ini anuá rō. Núu súcuan te vijna jeē iyó gá luz rī jíín ró, te caca ró jíín, chi sanaa ni rō te cuahān rī, te nájnūhun quendōo ró núū néē. Chi ñayuu cájica nájnūhun nuū néē, tu cájini i ndé nuū cuángoo i. ³⁶ Núu súcuan te níni ndéé gá rī jíín ró,

te candíje ró rúhū jeē cúu ri luz, návāha nduu ró ñáyuu cájica jíin luz, achí yá.

Súcuan ní cahān Jesús tāca jnúhun yáha, te cuahān-ni ya, te tuá ni stéén yā maá yá nuū i.

Jeē tu ní cá candíje ñayuu hebreo jeē cúu ya Cristo

³⁷ Te vésú cuehē jniñu jéhnū ní sáha Jesús jeē steén yā poder yā nuū i, te tu ní cá candíje i ya. ³⁸ Chi squícu nahín jnúhun ní cahān Isaías, tēe ní nacani jnúhun Yaā Dios nde jenahán:

Tátā Yaā Dios, tu ní cá candíje ñayuu jnúhun ní canacani ná,
te tu ní cá candíje i jniñu jéhnū jeē ní stéén ní poder ní núū i.

Achí Isaías. ³⁹ Jeē yúcuan tu ní cúu candíje i, chi ní cahān tucu Isaías:

⁴⁰ Ní sáha ya jeē nájnūhun cáhīyo cuáá ánuá i,
jíin jēē cá cunīhni ní i,
návāha coo nájnūhun jeē tu cájito i,
te ní ma jécūhun ní i,
ní ma násāma ini i quīvīcoo i nuū rī,
jeē nasávāha ri anuá i nuū cuéchi i.

Achí Cristo, achí tutu. ⁴¹ Jnúhun yáha ní cahān Isaías, chi je ní jito de ndese yōhōyó cújéhnū Jesús, te ní cahān de ndese coo quīvī jeē quíji ya.

⁴² Te vésú súcuan te cuehē ñayuu hebreo chi ní cá candíje i ya, te suni nde jíin sava tēe cá ndacu jniñu. Te tu ní cá cachi de jeē cá candíje de ya, chi síquī jeē cá yūhú de tāca tēe fariseo. Chi núu súcuan te quenehen ún de ini vehe īī sinagoga jeē ma cuáha ga jnúhun quīvīcoo de. ⁴³ Chi cá cusī gā ní de jeē cújéhnū de sáha ñayuu, vésú jeē cújéhnū de sáha Yaā Dios.

Jnūhun cáhán Jesús cúu jeē sándaā siquī ñáyuu

⁴⁴ Te ni cahān jee Jesús:

Ñayuu cá candíje ruhū, nasūu máñuhún-ni ruhū cá candíje i, chi suni cá candíje i nde maá Tátá rī, Yaā ní tají rúhū. ⁴⁵ Te ñayuu cájito nuū rī, suni cájito i nuū Yaā ní tají rúhū. ⁴⁶ Máá rí jeē cúu ri luz cúndijin ini anuá ñayuu, ni quiji ri ini ñayiví nāvāha tāca ñáyuu cá candíje ruhū, ma cáca i nájñuhun nuū néē. ⁴⁷ Te núu ñn ñayuu jíní sōho i jñuhun cáhán rī, te núu tu jétáhú i, te nasūu rúhū sándaā siquī i. Chi tú vēji ri jeē ndénehen rī cuēchi siquī ñayuu ñayiví, chi sa suhva jeē jnáma ri i. ⁴⁸ Te ñayuu jeē casquéhichí i ruhū te tu cájetáhú i jñuhun cáhán rī, iyó ñn jeē sándaā siquī i. Suu tāca jñuhun jeē ni cáhán rī, jñuhun un cúu jeē ndenehen cuēchi siquī i quiiví jínu ñayiví. ⁴⁹ Chi tu cáhán rī jeē cúu ni maá rí, chi Tátá rī, Yaā ní tají rúhū, máá yá ni ndacu jniñu nuū rī ndese cahān rī jín ndese stéén rī. ⁵⁰ Te jíní rī jeē jniñu ndácu Tátá rī sáha jeē cótecu ñayuu ní cáni. Núu súcuan te jñuhun cáhán rī, chi máni jñuhun jeē ní cachi Tátá rī cúu, áchí yá.

Jeē ní nacate ya jehē tēe cáscuáha

13

¹ Te jehíni inga quiiví te quejéé vico pascua. Te je jíní Jesús jeē ní quee quiiví jeē quénda ya ñayiví yáha quínuhun yā nuū Tatá yā. Te níni cúndáhú ni yā ñayuu maá yá jeē cáyūcú ini ñayiví. Te vijna jeē jínu jeē íne ya ñayiví, te sáha ya ñn jniñu jeē steén cají yá jeē cundáhú ni yā i.

² Te jexeén je ni squíví ini anuá Judas Iscariote sēhe Simón, jeē vijna nastúu de ya. ³ Te jíní Jesús jeē

véji ya nuū Yaā Dios, te nuhūn yā nuū Yaā Dios, jíin jéē ní sáha Tátá yā jeē kujéhu ya siquī ndihini. ⁴Te cúxíni ya jíin téē cáscuáha jíin yá, te ní ndocuíñi yā. Te ní stáa ya sahma ndíi ya, te ní jihni yā ñn toalla chīji ya. ⁵Te ní chuhun ya ndute ini ñn tijehēn. Te ní quejéé yá nácate ya jehē téē cáscuáha. Te násíchí yā jíin toalla jeē nuhní chīji ya.

⁶Te ní jinū yā nuū Simón Pedro. Te ní cahān Pedro jíin yá:

¿Sa máá ní nacate jehē ná naún?

⁷Te ní cahān Jesús:

Tu jécūhun ní rō jeē sáha ri vijna, te cúcuéé gá te jecūhun ní rō.

⁸Te ní cahān Pedro jíin yá:

Ma nácate cuíti ní jehē ná.

Te ní cahān Jesús:

Núu tú nacate ri jehē rō, te ma cúu cundúú ró jíin rí.

⁹Te ní cahān Simón Pedro:

Núu súcuan cúu te nasūu máá jehē-ni ná, chi suni nacate ní ndaha ná jíin xíní ná, áchí de.

¹⁰Te ní cahān Jesús jíin de:

Tēe jeē sa ní jichi, tu jíni ñúhún ndundoo ní cáhnu de, chi máá jehē-ni de, chi je íyó ndoo ní cáhnu de. Te máá ró chi je ní candundoo ró. Te tú ndihí ró cáhīyo ndoo.

¹¹Chi je jíni yā ndé ñn de cúu jeē nastúu de ya, te jeē yúcuan ní cahān yā: Tú ndihí ró cáhīyo ndoo.

¹²Te nuū ní jínu ní nacate ya jehē de jíináhan de, te ní naquihín ya sahma ndíi ya, te ní nucōo tucu ya nuū mesa. Te ní cahān yā:

¿A cájecūhun ní rō na vé cuní cahān jeē ní sáha ri jíin ró? ¹³Cácahān rō jeē Maestro jíin Jítoho rō

cúu ri, te ndaā cácahān rō, chi suu ndije cúu ri. ¹⁴ Núu súcuan te vēsú Maestro rō jín Jítóho rō cúu ri, te ni nacate ri jehē rō jijnáhan ró, te suni súcuan cánuú jēē nacate máá ró jehē jnáhan ró. ¹⁵ Chi jniñu yáha ni sáha ri jeē steén rī nuū rō jeē suni súcuan sa cuajniñu ró núu jnáhan ró, nájñūhun sa máá rí ni jejniñu ri nuū rō. ¹⁶ Jendaá cahán rī jín ró jeē ñn mozo tu cújéñnu de nuū patrón de, te tēe jíca jniñu táhú nuū de, te cújéñnu de nuū tée ni tají de. Te máá ró cácuu mozo rī, te na cuájniñu ró núu jnáhan ró nájñūhun ni steén rī nuū rō. ¹⁷ Te núu ni cajecūhun ni rō jñūhun yáha, te yōhyo ndetū rō te núu squícu ró.

¹⁸ Te nasūu jēē cahán rī jeē ndiñi ró ndétū, chi je jíní rī tāca róhó jēē ní nacāji ri. Te cánuú squícu jñūhun yáha jeē cáhán tutu iñ: Tēe yéji staā jín rí, ni ndió cuñí de siquí rī, achí tutu. ¹⁹ Te vijna te je cástūhun rí tāca jēē yáha núu rō nde ná tu coo, návāha núu na cóo, te candíje ró jēē máá rí cúu Yaā ní tají Yaā Dios. ²⁰ Jendaá cahán rī jín ró jeē na-ni ñayuu jeē cuatáhu i tāca jēē tají rí, te ruhū jetáhu i. Te ñayuu jetáhu rúhū, suni jétáhu i Yaā ní tají rúhū vēji rí, achí yá.

Jeē ní cachi yā jeē nastúu Judas yā

(Mt. 26.20-25; Mr. 14.17-21; Lc. 22.21-23)

²¹ Te ná ni cahán Jesús tāca jñūhun yáha, te ni cucuíhyá ndasí ni yā. Te ni cahán cají yá:

Jendaá cahán rī jín ró jijnáhan ró jēē ñn máá ró nastúu ruhū, achí yá.

²² Yūcuán na te tēe cáscuáha jín yá, ni candacoto de nuū jnáhan de, cájeni ni de ndé ñn de cúu jeē ni cáhān yā. ²³ Te ñn máá tée scuáha jeē maní gā

yā jíin, néne de xiin ya mesa jeē cácuXíni de jíin yá. ²⁴ Te ni sáha Simón Pedro seña nuū de jeē na cájnūhún de ya ndé ìn de cúu jeē ni cáhān yā. ²⁵ Yūcuán na te tēe un ní scáyì de máá de nuū Jesús, te ni cajnūhún de ya:

¿Ndé ìn de cúu? áchí de jíin yá.

²⁶ Te ni cahān Jesús:

Na chūndaji rì staā te cuāha rì nuū ìn de, te suu tēe un cúu, áchí yá.

Te ni chundaji ya staā, te ni jēhe ya nuū Judas Iscariote sēhe Simón. ²⁷ Te jeē ní quihin de staā ún, te ni quīvi-ni Satanás ini anuá de. Yūcuán na te ni cahān Jesús jíin de:

Jniñu jeē sáha ró, na sáha yachī rō.

²⁸ Te ni ìn tēe cáyeji staā jíin yá, tu ní cájecūhun ni de naun ni cahān yā súcuan jíin de. ²⁹ Chi sava de cájeni ni de jeē ni cáhān Jesús jíin Judas jeē cuāan de jeē jíni ñúhún yá vico ún, chí jēe cuāha de jecu xūhun núu ñayuu ndahú. Chi máá de ndíso yijni xūhún. ³⁰ Te jeē ní yeji de staā ún, te ni quenda-ni de cuahān de. Te je ni cuaa.

Jeē ní ndacu ya jniñu jée

³¹ Yūcuán na te jeē cuahān Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhnū rì, te suni jíin rúhū te cuni ñayuu ndese cújéhnū Yaā Dios. ³² Te núu jíin rúhū cuni ñayuu ndese cújéhnū Yaā Dios, núu súcuan te suni stéén Yaā Dios ndese cújéhnū ruhū jeē cúu rì Sēhe ya. Te yachī-ni stéén yā. ³³ Séhē, tuá nahān condee rī jíin ró jijnáhan ró. Te nanducú ró ruhū, te nájñūhun ni cahān rī jíin táca jnáhan yó hebreo, suni súcuan

cáhán rī jiín ró vijna, jeē ma cúu jinūcoo ró núū quihín rī. ³⁴Te vijna te ndácu ri ñn jniñu jéé núū rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró. ³⁵Te núu cúndáhú ni rō jnáhan ró, súcuan te cuni tāca ñáyuu jeē cácuu ró téé cáscuáha jiín rí, achí yá.

Jeē ní cachi yā jeē yūhu Pedro cahān de jeē jiní de ya

(Mt. 26.31-35; Mr. 14.27-31; Lc. 22.31-34)

³⁶Te ni cahān Simón Pedro jiín yá:

¿Ndé nuū quihín ni núu súcuan?

Te ni cahān Jesús:

Nuū quihín rī chi ma cúu condiquīn rō ruhū vijna, te cúcuéé gá te jinū rō.

³⁷Te ni cahān Pedro:

¿Najehē ma cúu condiquīn na níhín vijna? Tu yúhú ná cuu na jéē siquí ni.

³⁸Te ni cahān Jesús:

¿A jéni ni rō jeē tu yúhú ró cuu rō jeē siquí rī? Jendaá cahán rī jiín ró jeē nde ná tu cana líhli, te unī jínu yūhu ró te cahān rō jeē tu jíní rō ruhū. Achí yá.

Jesús cúu ichi jeē jinú yō nuū Tatá yā

14

¹Te ni cahān gā yā:

Ma cucuíhyá ni rō siquí tāca jnúndóho. Na cándíje ró jéé sáha Yaā Dios jehē rō, te suni na cándíje ró jéé sáha ri jehē rō. ²Chi nuū ndeé Tátá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rí nuū rō nuú. Núu súcuan te quihín rī quisátūhva ri nuū cóyūcu ró. ³Te

jeē quihín rī sātūhva ri nuū cóyūcu ró, te ndiji ri quinaquihin ri rohó quíhīn yō, návāha suni coyūcu ró nuū cóndee maá rí. ⁴ Te je cájini rō ndé nuū quihín rī, te cájini rō ndese jinū rō yūcuán. Achí yá.

⁵ Te ni cahān Tomás jíin yá:

Tu cájini na ndé nuū quihín ni, ¿te ndese cuni ná ichi jínú yūcuan núu súcuan?

⁶ Te ni cahān Jesús jíin de:

Máá rí cúu ichi jinū rō andiví, te máá rí cúu jnūhun ndaā jíin jnúhun cotecu rō nī cáni. Te ni ñn ma jinú nuū Tatá rī te núu tú ruhū. ⁷ Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chi je ni cajito ró núu rī, achí yá.

⁸ Te ni cahān Felipe jíin yá:

Stéén ni Tátá ni núu ná, te na cúvāha ni na jíjnáhan ná, áchí de.

⁹ Te ni cahān Jesús:

Felipe, je ni cuu cuehē quiví jíca ri jíin ró jíjnáhan ró, ¿te á ná tu cuni rō ndé ñn cúu ri naún? Tēe jeē jíto ruhū, suu Tátá rī jíto de. Núu súcuan ¿te najehē cahán rō jeē steén rī Tatá rī nuū rō? ¹⁰ ¿A tu cándíje ró jéē ñn-ni cúu ri jíin Tátá rī, te Tátá rī ñn-ni cúu ya jíin rí? Tāca jnúhun cáhán rī jíin ró, nasūu jnúhun máá rí cúu. Chi Tátá rī jeē ñn-ni cúu ya jíin rí, máá yá sáha tācá jniñu jeē sáha rí. ¹¹ Candíje ró jíjnáhan ró jéē ñn-ni cúu ri jíin máá Tátá rī, te Tátá rī ñn-ni cúu ya jíin rí. Te núu tu cájecūhun ni rō, te candíje ró ruhū siquī tācá jniñu sáha rí. ¹² Jendaá cahán rī jíin ró, núu ndé ñáyuu candíje ruhū, jniñu jéhnū jeē sáha ri yāhá, suni sáha i. Te jéhnū ga jniñu sáha i vēsú yāhá, chi quinuhun rī nuū ndeé Tatá rī. ¹³ Te

tācá na-ni vé cacán rō nuū Tatá rī siquī jeē cá candíje rō jéē cúu ri Sēhe ya, te sáha ri jeē cacán rō, te súcuan stéén rī jeē yóhyo cújéhnú Tatá rī. ¹⁴ Chi tācá na-ni vé cacán rō siquī jeē cá candíje rō rúhū, te sáha nahín rí.

Jeē ni jéjnūhun ya jeē tají yá Espíritu Santo

¹⁵ Te núu manī rō jíin rí jíjnáhan ró, te na squícu ró jniñu ndácu ri nuū rō. ¹⁶ Te cacān tahu rī nuū Tatá rī, te tají yá inga Yaā chindéé ñáhán róhó, te sáha ya jeē cóo siñ ni rō jíjnáhan ró. Te Yaā un cúu máá Espíritu jeē steén jnūhun ndaā, te condee yā jíin ró ní cáni. ¹⁷ Te ñayuu ñayīví má cúu cuatáhú i ya, chi tu cúu coto i nuū yā, ni tu cúu cuni i ndese Yaā cúu ya. Te máá ró chi je cájini rō ndese Yaā cúu ya, chi ndéé yá jíin ró, te condee yā ini anuá rō ní cáni. ¹⁸ Ma stóo uun ri rohó, chi ndiji ri nuū rō. ¹⁹ Jecu na quiví te ma cóto ga ñayuu ñayīví núu rī. Te máá ró jíjnáhan ró chi coto ró núu rī, chi cotecu rī ní cáni, te jeē yúcuan suni cotecu máá ró. ²⁰ Te quiví ún te cuni rō jeē ñn-ni cúu ri jíin Tatá rī, te máá ró ñn-ni cúu ró jíin rí jeē ndeé rí ini anuá rō jíjnáhan ró. ²¹ Te na-ni ñayuu núu ñúhun ni i jniñu ní ndacu ri, te squícu i, ñayuu un cúu jeē maní ndije jíin rí. Te ñayuu jeē maní jíin rí, suni coo manī Tatá rī jíin i. Te suni ruhū coo manī rī jíin i, te stéén rī nuū i jeē nduú rí jíin i. Achí yá.

²² Te ni cahān Judas jíin yá (te nasūu téé cúu Iscariote):

Najehē cúu jeē steén ni máá ní nuū ná, te nuū ñayuu ñayīví chi tuú?

²³ Te ni cahān Jesús:

Ñayuu jeē maní jiín rí, chi cásquícu i jeē cahán rī. Te coo manī Tatá rī jiín i. Te Tatá rī jiín máá rí quijicoo ri cundúú rí jiín i. ²⁴ Te ñayuu jeē tú manī jiín rí, tu cásquícu i jeē cahán rī. Te jnūhun cájini sōho ró cahán rī, nasūu jnúhun máá rí cúu, chi jnūhun máá Tatá rī jeē ní tají rúhū cúu.

²⁵ Tāca jnúhun yáha cahán rī jiín ró níni íne ga rī jiín ró. ²⁶ Te Tatá rī chi tají yá Espíritu Santo, quiji nucuññi nuū rī. Te máá yá chindéé ñáhán yá rohó, te sáha ya jeē cóo sñ ni rō. Te stéén yā tāca jnúhun nuū rō, te nacachi tucu ya tāca jéé ni cáhān rī jiín ró.

²⁷ Te jeē quihín rī, te sáha ri jeē cóo ndeyí coo sñ ni rō. Nájñūhun íyó ndeyí sñ ni maá rí, suni súcuan coo ndeyí sñ ni rō sáha ri. Te jeē sáha ri jeē cóo ndeyí sñ ni rō, tu quíjnáhan jiín jnúhun ndeyí cácahān ñayuu ñayiví. Ma cucuíhyá ni rō siquī tāca jnúndóho, te ni ma yūhu ró. ²⁸ Je ni cajini sōho ró jéé ni cáhān rī jeē quihín rī, te ndiji ri cundúú rí jiín ró. Te núu cáhīyo manī vāha ró jiín rí, te cusñ ni rō jeē ni cáhān rī jeē nuhún rī nuū Tatá rī. Chi cújéhnua ga Tatá rī vijna vēsú ruhū. ²⁹ Je ni castūhun rí nuū rō tāca jnúhun yáha nde ná tu coo, návāha núu je ni cuu, te candíje ró rúhū jijnáhan ró.

³⁰ Ma cahán rī cuehē gā jnūhun jiín ró, chi je vēji jexeén jeē ndácu jniñu ini ñayiví yáha. Te tú na vé cúu sáha siquī rī nuú. ³¹ Te na cóo nájñūhun ni ndacu Tatá rī jniñu nuū rī, návāha cuni ñayuu ñayiví jéé maní rī jiín Tatá rī, te sáha ri jniñu ní ndacu ya. Ndocuññi jijnáhan ró na quíngoo yó. Achí yá.

Jesús cúu nájñūhun yoyúcu uva

15

¹ 'Máá rí cúu nájnūhun yoyúcu uva váha ndaā, te Tátá rī cúu nájnūhun tēe ndíto yoyúcu uva un. ² Te máá ró chi cácuu ró nájnūhun ndaha, te núu tu jéhe ró ndéhē te quende yā rohó. Te núu cácuu ró nájnūhun ndaha jeē jéhe ndehē, te nasándoo ya nacañde yā rohó nájnūhun jeē cúu ró ndaha ún, návāha cuāha ró cuéhē gā ndehē. ³ Te máá ró chi je ni candundoo ánuá rō jín jnūhun ni steén rī nuū rō, nájnūhun ndúndoo ndaha uva. ⁴ Na cundúú ró jín rí, te suni máá rí cundúú rí jín ró. Ìn ndaha uva ma cúu cuāha ndehē jeē maá, te núu tu yíjnñ jicā yóho. Te suni súcuan máá ró, ma cúu sáha ró jniñu váha te núu tu cundúú ró jín rí.

⁵ 'Máá rí cúu yoyúcu un, te máá ró cácuu ndaha ri. Ñayuu jeē nduú jín rí, te ruhū ndúú rí jín i, máá i cúu nájnūhun ndaha jeē jéhe cuehē ndehē. Chi núu tú cundúú ró jín rí, te tú cuiti na jniñu váha cuu sáha ró. ⁶ Ñayuu jeē tu cundúú jín rí, quende yā i nájnūhun ìn ndaha uva, te ichī. Te ndoho i nájnūhun ndaha uva un jéē ndutútú te cayū nuū ñuhún.

⁷ 'Núu ndúú ró jín rí, te cáñuhun ni rō jnūhun cáhán rī, yūcuán na te cacān rō na-ni vé cácuni rō, te sáha ri jeē cácahān rō. ⁸ Te núu cásáha ró cuéhē jniñu váha, súcuan cástéén rō jeē cúu ndije ró ñayuu cascuáha jín rí, te súcuan nácuni ñayuu jeē yóhyo cújéhnu Tátá rī. ⁹ Nájnūhun manī Tátá rī jín rí, suni súcuan manī rī jín ró jijnáhan ró. Núu súcuan te ma siaá rō jnūhun manī rī jín ró. ¹⁰ Núu squícu ró jniñu ní ndacu ri nuū rō, te níní coo manī rī jín ró, nájnūhun máá rí squícu ri jniñu ní ndacu Tátá

rī nuū rī, te níní íyó mánī yā jíin rí.

11 'Súcuan ni cahān rī jíin ró návāha coo sīi ni rō nájñūhun íyó sīi ni rī, chí nde cusīi teyí ni rō. 12 Te yāha cúu jñiñu ndácu ri nuū rō jijnáhan ró: jeē na cúndáhú ni rō jnáhan ró nájñūhun cúndáhú ni rī rohó. 13 Núu ñn tēe cuu de jehē amigo de, te tuá na vé cúmanī gā sáha de jeē cundáhú ni de amigo de. 14 Te máá ró cácuu amigo rī núu squícu ró jñiñu ndácu ri nuū rō. 15 Ma cahán gā rī mozo jíin ró, chí ñn mozo tu cástūhún patrón nuū i ndese jéni ni de sáha de. Chí sa suhva amigo cahān rī jíin ró, chí je ni castūhun rí nuū rō tāca jñūhun ni cahān Tatá rī jíin rí. 16 Máá rí ni nacāji rōhó jéē jnáma rī rohó, te nasūu máá ró ni cánacani ni xīhna gā jeē cóndiquīn rō ruhū. Te ni jeni ri rohó jéē caca ndaā rō te scándíje ró cuéhē ñayuu jeē cuu i sēhe ri níi cáni. Te súcuan te ndíhi jeē cacán rō nuū Tatá rī siquī jeē cácandíje ró rúhū, sáha ya jeē jicán rō. 17 Te yāha cúu jñiñu ndácu ri nuū rō: jeē na cúndáhú ni rō jnáhan ró.

Jeē cáquitī ni ñayuu ñayīvi núu Jesús jíin núu ñáyuu cácandíje

18 'Te núu cáquitī ni ñayuu ñayīvi núu rō jijnáhan ró, te je cájini rō jeē xīhna gā nuū máá rí ni caquitī ni i. 19 Te núu jeē iyó gá rō jíin modo ñayuu ñayīví, te coo manī ñayuu ñayīvi jíin ró nuú, nájñūhun manī i jíin jnáhan i. Te ni nacāji ri rohó jéē tuá coo ró jíin modo ñayuu ñayīví. Te jeē yúcuan cáquitī ni i nuū rō, chí tuá cácuu ró cuenta ñayīví. 20 Nucūhun ni rō jñūhun ni cahān rī jíin ró: Núu tu íyó yíñūhún ñáyuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rōhó

jéē cácuu ró mozo rī. Te núu jeē ni cájetáhú i jnūhun ni steén rī, te suni cuatáhú i jnūhun cástéén rō. ²¹ Te tācá jniñu yáha sáha i jíin ró jeē siquí ruhū, chi tu cájini i Yaā ní tají rúhū vēji rī.

²² Núu jeē tu ní quíji ri nacani ri jnūhun nuū i, te ma cóo cuēchi i núú. Te vijna chi ma cóo ga cahān i jeē tu jíin i jeē iyó cuéchi i. ²³ Ńayuu jeē cáquitī ni nuū rī, suni nuū Tatá rī cáquitī ni i. ²⁴ Núu jeē tu ní sáha ri jniñu jéhu nuū i jeē ní ĩn tēe tu ní sáha de súcuan, te ma cóo cuēchi i núú. Te vijna je ni cajito i jniñu ún, te vēsú súcuan te cáquitī ni i nuū rī jíin núú Tatá rī. ²⁵ Te súcuan cásáha i návāha squícu jnūhun yósó núú tútu ley Yaā Dios jeē cánevāha i: Ni caquitī ni i nuū rī, vēsú tú na cuēchi ri, achí.

²⁶ Te tají rí maá Yaā chindéē ñáhán róhó te sáha ya jeē cóo sĥ ni rō. Te Yaā un cóo máá Espíritu jeē steén jnūhun ndaā, te quiji ya nde nuū Tatá rī, te nacani cájí yá jnūhun rī. ²⁷ Te suni máá ró nacani ró jnúhun rī, chi je cáhĥin ro jíin rí nde ná ni quejéé rí nácani ri jnūhun.

16

¹ Tāca jnúhun yáha ní cahān rī jíin ró návāha ma náyūhu ró jeē quíji jnūndóho. ² Chi quenehen i róhó jéē ma cuáha ga i jnūhun cone ró táca vehe ĩi sinagoga. Te quee quivĥi jeē cahni i róhó, te cani ni i jeē ĩn jniñu váha ni sáha i nuū Yaā Dios. ³ Te súcuan sáha i jíin ró, chi tu cájini cuĥi i máá Tātá rī ni máá rí. ⁴ Te ni cahān rī jnūhun yáha jíin ró návāha núu je ni quee quivĥi jeē súcuan coo, te nucūhun ni rō jeē jé ni cahān rī jíin ró.

Jniñu sáha Espíritu Santo

'Te tu ní cáhán rī jnūhun yáha jíin ró nde xīhna ñúhún, chí íne máá rí jíin ró jijnáhan ró. ⁵ Te vijna chí nuhūn rī condee rī jíin Yaā ní tají rúhū vēji rī. Te ni ñn ró tu cájnūhun ró ndé nuū quihín rī. ⁶ Chí máá jéē cácuulhyá ndasí ni rō jeē ni cáhán rī súcuan jíin ró. ⁷ Jendaá cahán rī jíin ró: Jeē váha máá ró jijnáhan ró cúu jeē quihín rī. Chí núu tú quihín rī, te ma quíji Yaā chindéé ñáhán rōhó te sáha ya jeē cóo sī ni rō. Te núu cuahán rī, te tají rí yā quíji ya nuū rō. ⁸ Te jeē quée yā, te stéén yā nuū ñáyuu ñayīvi jéé iyó cuéchi i, jíin ndese quīvicoo i ichi ndaā, jíin jéé sándaā Yaā Dios siquī cuéchi i. ⁹ Stéén yā jeē iyó cuéchi i, chí tu cácandíje i ruhū. ¹⁰ Te stéén yā siquī ichi ndaā, chí máá rí nuhūn rī nuū Tatá rī, te ma cóto ga rō nuū rī. ¹¹ Te stéén yā siquī jeē sándaā Yaā Dios cuéchi ñayuu, chí je ni cundaā jeē jnahnú ndetū máá jéxeén jeē cujéhnū ini ñayīvi yáha.

¹² 'Te iyó cuéhē gā jnūhun cúní rī cahán rī jíin ró, te ma cúu jecūhun ni rō vijna. ¹³ Te jeē quée máá Espíritu jeē steén jnūhun ndaā, te máá yá steén tāca jnūhun ndaā un núu rō. Chí ma cahán yā jeē máá yá, chí cahán yā tāca jéé jíni sōho ya cahán Yaā Dios. Te stéén yā siquī tācá jniñu jeē coo. ¹⁴ Te stéén yā jeē cujéhnū rī, chí nacastūhun yá nuū rō tāca jnūhun jeē jé ni cahán rī, te sáha ya jeē jécūhun ni rō. ¹⁵ Ndihi ndese cújéhnū Tatá rī, suni súcuan cújéhnū máá rí. Jeē yúcuan ní cahán rī jeē Espíritu Santo nacastūhun yá nuū rō tāca jnūhun jeē jé ni cahán rī, te sáha ya jeē jécūhun ni rō jijnáhan ró.

Vēsú cácuulhyá ni rō, te ndusñ ni rō

16 'Jecu na te ma cóto ga rō nuū rī. Te jecu tucu quivī te coto tucu ró núū rī, chi quinuhun rī nuū ndeé Tátá rī. Achí yá.

17 Yūcuán na te sava tēe cáscuáha jíin yá, ni caca-jnūhun jnáhan de:

¿Na jnūhun cúu jeē yáha jeē cahán yā jíin yó? Chi áchí yá jeē jecu na te ma cóto ga yō nuū yā, te jecu tucu quivī te coto tucu yó núū yā, chi siquī jeē quínuhun yā nuū ndeé Tátá yā. 18 ¿Na jnūhun cúu jeē yáha jeē cahán yā, jecu na? Tu cájecūhun ni yō na vé cúu jeē cahán yā. Achí de.

19 Te ni jini Jesús jeē cácuni de cajnūhún de ya. Te ni cahán yā jíin de:

¿A cácajnūhun jnáhan ró na vé cúu jeē ni cáhān rī jíin ró jeē jecu na te ma cóto ga rō nuū rī, te jecu tucu quivī te coto tucu ró núū rī? 20 Jendaá cahán rī jíin ró jeē ndahyū rō jijnáhan ró te cucuíhyá ni rō, te ñayuu ñayiví chi sa cusī ni i. Te vēsú cucuíhyá ni rō, te sa ndusī ni rō jeē cóto tucu ró núū rī. 21 ĩn ñahan núu cuacuyajni scácu ña, te jéhnde chīji ña, chí je ni quee hora jeē scácu ña. Te núu je ni scácu ña sūchi lúli, te tuá nahán ña jeē ní ndoho ña, chí cusī ni ña jeē ní cacu sēhe ña. 22 Te suni súcuan cúu jeē cándoho ró vijna, chí cácucuíhyá ni rō jíin rí. Te jecu-ni quivī te coto jnáhan tucu yó, te cusī ndasí ni rō. Te ni ĩn ma cúu casí jeē cusī ni rō.

23 'Te quivī ún chi tú na vé cacān gā rō nuū rī. Chi jendaá cahán rī jíin ró jeē nuū maá Tátá rī cacān rō, te sáha ya ndihí jeē cájicān rō, siquī jeē cácandíje ró rúhū. 24 Nde vijna te ná tu cacān rō nuū Tátá rī jeē jíin síhví rí. Te vijna te na quéjéé ró cacān rō jíin síhví rí, te nihīn rō, návāha cusī ndasí ni rō.

Je ni quende yā poder ndihi jeneé cáhīyo ini ñayīví

²⁵ Tāca jnúhun yáha ní cahān yatá rí jín ró. Te quee quivī jeē ma cahán yatá gá rī jín ró, chi sa suhva castūhun cájí rí nuū rō siquī Tatá rī. ²⁶ Te quivī ún chi cacān rō nuū Tatá rī siquī jeē cá candíje ró rúhū. Te tu cáhán rī jín ró jeē cacán tahu rī jehē rō nuū Tatá rī. ²⁷ Chi máá Tátá rī je cúndáhú ni yā rohó siquī jeē cáhīyo manī rō jín rí, te ni cacandíje ró jéē ndé nuū maá yá vēji rí. ²⁸ Ni quenda ri nde nuū Tatá rī, te ni quee rī ini ñayīví. Te vijna te quenda ri ini ñayīví, te nuhūn tucu ri nuū Tatá rī. Achí yá.

²⁹ Te ni cacahān tēe cáscuáha jín yá:

Vijna te cáhán cají ní, te tuá cahán yatá ní. ³⁰ Vijna te cájini na jéē jini ni ndivii cuiti, te tuá jini ñúhún jéē cájnūhún ni ñn ná níhín. Jeē yúcuan cá candíje ná jéē véji ní ndé nuū Yaā Dios. Achí de.

³¹ Te ni cahān Jesús jín de:

¿A ndé vijna te cá candíje ró naún? ³² Te quiiji quivī, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéē quéndōo máñúhún rí, chi Tátá rī íne ya jín rí. ³³ Tāca jnúhun yáha ní cahān rī jín ró návāha coo ndeyí coo sī ni rō siquī jeē cá candíje ró rúhū. Ini ñayīví chi cánuú coto ró jnúndóho. Te vésú súcuan te na cóo sī ni rō, chi je ni quende rī poder tāca jéneé cáhīyo ini ñayīví. Achí yá.

Jeē ni jicān tahu Jesús jehē ñayuu cá candíje

17

¹ Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátā, je ni quee quivī jeē ndóho ná. Vijna te steén ni jéē cujéhnū máá ná jeē cúu ná Séhe ní, návāha suni máá ná steén na jéē cujéhnū máá ní. ² Chi ni sáha ní jéē ndíso jníñu ná síquī tāca ñáyuu, návāha tāca ñáyuu jeē ni jéhe ní núū ná, cotecu i ní cáni sáha ná. ³ Te suhva cúu jnūhun cotecu i ní cáni: suu jeē na cúni i níhín jéē mañúhún-ni ní cúu Yaā ndaā, jíín jéē cúni i sáñā jeē cúu ná Jesucristo, Yaā ní tají ní.

⁴ Je ni steén na núū ñáyuu ñayiví jeē cujéhnū ní, te je sínu ná jniñu ní ndacu ní núū ná. ⁵ Te vijna, Tátā, sáha ní jéē ndujéhnū tucu ná ndé nuū néne ní, nájnūhun cújéhnū ná jíín ní nde ná tu jecōo ñayiví.

⁶ Ñayuu jeē ní nacāji ní ini ñayiví, ni jéhe ní i nuū ná, te ni steén na núū i ndese Yaā cúu ní. Cuenta maá ní cúu i, te ni jéhe ní i nuū ná. Te ni cajetáhú i jnūhun ní, te ni casquícu i. ⁷ Te vijna te cájini i jeē ndé nuū maá ní vēji tāca jéē iyó jíín ná. ⁸ Chi tāca jnūhun ni cahān ni jíín ná, ní castūhun ná núū i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají sáña.

⁹ Te jícán tahu na jéhē maá i jíínáhan i. Tu jícán tahu na jéhē ñáyuu ñayiví jeē tu cáncandíje, chi sa jéhē maá ñáyuu ni jéhe ni núū ná, chi cuenta maá ní cácuu i. ¹⁰ Te tācá i jeē yíhi i ndaha máá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhnū ná.

¹¹ Te tuá condee ná ini ñayiví. Te maá i chi quendōo i ini ñayiví, te maá ná chi najeē ná condee na jíín ní. Yaā i Yaā ndoo cúu ní, Tátā. Te jíín poder ní condito ní tāca ñáyuu ni jéhe ni núū ná, návāha inuú na cóo ni i jíínáhan i, nájnūhun cúu maá yó.

12 Te jeē ní condee na jíin i ini ñayīví, te jíin poder ni ní condito ná i. Tāca ñáyuu ni jéhe ni núū ná, ni condito yúcún ná i. Te tu ní jéhe na jnúhun naa i jíjnáhan i, chi máá ñn-ni tēe jeē je cúu de tēe jnahnū ndetū, návāha squícu jnúhun yósó núū tútu iī.

13 Te vijna te najeē na núū ní, te cáhán na táca jnúhun yáha jíin i níní jéē íne ga ná ini ñayīví, návāha na cóo sī ndasí ni i nájnūhun cúsi ni maá ná. 14 Ni castūhun ná jnúhun ní núū i. Te ni caquiñi ni ñayuu ñayīví núū i, chi tuá cácuu i cuenta ñayīví, nájnūhun máá ná tu cúu ná cuenta ñayīví. 15 Te tu jícan tahu na jéē quénehen ní i ini ñayīví, chi sa suhva jeē cóndito ní i nuū jexeén. 16 Nasūu cuenta ñayīví cácuu i, nájnūhun máá ná jéē násūu cuenta ñayīví cúu ná. 17 Jíin jnúhun ndaā ní te sáha ní jéē coo ndoo coo iī i nuū ní. Tāca jnúhun cáhán maá ní cúu jnúhun ndaā. 18 Te nájnūhun ni tají ní sáña ní quiiji ná ini ñayīví, suni súcuan tají ná i nacani i jnúhun ní núū ñáyuu ñayīví. 19 Te jehē maá i cúu jeē jéhe ná máá ná cuu ná, návāha suni máá i coo ndoo coo iī i nuū ní jéē jíin jnúhun ndaā.

20 Te nasūu máá ñn-ni jehē ñáyuu yáha jícan tahu na, chi suni jehē tāca gá ñáyuu jeē candíje i sáña núu na cúni sōho i jnúhun jeē nacani máá i jíjnáhan i. 21 Te jícan tahu na jéē ñnuú na cóo ni i jíjnáhan i. Nájnūhun ñn-ni cúu ní jíin ná, Tátā, te ñn-ni cúu ná jíin máá ní, suni súcuan na cóo ñnuú i jíin yó. Te cúni na jéē ñnuú na cóo ni i, návāha na cándíje ñayuu ñayīví jéē maá ní ni tají ní sáña. 22 Ni sajhenu ná i nájnūhun ni sajhenu ní sáña, návāha ñnuú na cóo ni i, nájnūhun ñnuú-ni cúu yó. 23 Te ndúú ná jíin i, te ndúú ní jíin ná, te súcuan te ñnuú cuñi coo ni i

jíjnáhan i. Yūcuán na te cuni ñayuu ñayīvi jēē maá ní ní tají ní sāña, jíin jēē maní ndasí ní jíin i nájnūhun manī ni jíin ná.

²⁴ Tātā, máá ní ni jēhe ní i nuū ná. Te cúni na jēē cóyūcú i jíin ná nuū cóndee ná, návāha coto i ndese luu cújēhnu ná ni sáha ní. Chi íyó mánī ndasí ní jíin ná nde ná tu jecōo ñayīvi te nde vijna. ²⁵ Yaā ndaā cúu ní, Tātā, te ñayuu ñayīvi tu jíin i níhín, te máá ná chi jíin na níhín. Te ñayuu yáha chi cájini i jeē maá ní ni tají sáña. ²⁶ Ni steén na núu i jíjnáhan i ndese Yaā cúu ní. Te steén gā na súcuan nuū i, návāha na cóo manī ndasí i jíin jnáhan i, nájnūhun íyó mánī ndasí ní jíin ná, te návāha condee ná ini anuá i. Achí yá.

Jeē ní cajñi de Jesús

(Mt. 26.47-56; Mr. 14.43-50; Lc. 22.47-53)

18

¹ Te nuū ní cuu ni cahān Jesús tāca jnúhun yáha, te ni quenda ya jíin téē cáscuáha jíin yá, cuahān yā inga lado yuu Cedrón. Te yūcuan íyó ñin huerto nuū ní quīvi ya jíin téē cáscuáha jíin yá. ² Te Judas, téē jeē nastúu de ya, suni jíin de lugar un, chi cuehē jínu ni nataca Jesús yūcuan jíin téē cáscuáha jíin yá. ³ Te ni jinū de yūcuan jíin ñin grupo soldado jíin jecu policia cándito templo, jeē ní catajī sutū cácujeñnu jíin téē grupo fariseo. Te cándiso de machete, te cájñi de linterna jíin yiti. ⁴ Te Jesús je jíin yā tāca jnúndóho jeē véji siquī yā. Te ni quenda ya ichi núu de, te ni cahān yā:

¿Ndé ñin cánanducú ró?

⁵ Te ni cacahān de jíin yá:

Jesús téē ñuu Nazaret cánanducú rí.

Te ni cahān yā:

Máá rí cúu.

Te Judas, tēe jeē nástúu de ya, suni íne de jíin tēe ún. ⁶ Te jeē súcuan ni cahān yā, máá rí cúu, te ni cajica yátá de, te ni cacotúú-ni de. ⁷ Yūcuán na te ni cajnūhún tucu ya de:

¿Ndé ñn cánanducú ró?

Te ni cacahān de:

Jesús tēe ñuu Nazaret.

⁸ Te ni cahān Jesús:

Je ni cachi rī jeē maá rí cúu. Te núu ruhū cánanducú ró, te máá-ni ri jnñ ró, te tēe yáha na quíngoo de. Achí yá.

⁹ Súcuan ni cuu návāha na squícu jnūhun jeē ni cáhān yā jíin Tátá yā: Tu ní jéhe na jnúhun naa ni ñn tēe jeē ni jéhe ni núu na, áchí yá. ¹⁰ Te Simón Pedro ndíso de ñn espada. Te ni tava de, te ni jehnde de sōho lado váha ñn tēe nání Malco. Te tēe un cúu de mozo maá sūtū kujéhnu. ¹¹ Te ni cahān Jesús jíin Pedro:

Nachuvāha espada rō ini cubierta. ¿A tu cánuú jéē ndóho ri jnūndóho yáha jeē ni sándaā Tatá rī jeē ndóho ri? Achí yá.

Jeē ní indichi Jesús nuū sutú kujéhnu

(Mt. 26.57-58; Mr. 14.53-54; Lc. 22.54)

¹² Yūcuán na te tēcá soldado un, jíin capitán de, jíin táca policía tēe hebreo un, ni cajññ de Jesús, te ni cajihni de ya. ¹³ Te xīhna gā vehe Anás cuangoo de jíin yá. Te tátá chíso Caifás cúu Anás. Te Caifás cúu máá sūtū kujéhnu ga cuiyā ún. ¹⁴ Te suu de ni cachi nuū jnáhan de hebreo jeē cánuú jéē cúu ñn tēe jehē nación de.

*Jeē ní cachi Pedro jeē tu jíní de ya
(Mt. 26.69-70; Mr. 14.66-68; Lc. 22.55-57)*

¹⁵ Te Simón Pedro jíin inga tēe scuáha, cándiquin de Jesús cuangoo de yatā yā. Te inga tēe scuáha ún chi jíní jnáhan de jíin sūtū cujéhnu. Jeē yúcuan ní quívi de jíin Jesús ini patio vehe sutū cujéhnu ún. ¹⁶ Te Pedro ni quendōo de yatā yehyí. Te máá tēe scuáha jēē jíní jnáhan jíin sūtū cujéhnu ún, ni quenda de ni cahān de jíin ñahan ndíto yéhyí, te ni squívi de Pedro ini patio. ¹⁷ Yūcuán na te ñahan ndíto yéhyí un ní cajnūhún ña Pedro:

¿A násūú ñin tēe scuáha jíin tēe índichi nuū sutú un cúu ró?

Te ni cahān de:

Nasūu cúu ri, achí de.

¹⁸ Te tāca mozo jíin policía un ní cascáyú de ñuhūn jíin tícāyi, chi mījin sáha. Te cáhīn de cānasaā de. Te suni índichi Pedro, násaā de jíin táca tēe ún.

*Jeē ni stíchí sutū cujéhnu ún Jesús
(Mt. 26.59-66; Mr. 14.55-64; Lc. 22.66-71)*

¹⁹ Te sutū cujéhnu un ní stíchí de Jesús ndé-ni cúu tēe cáscuáha jíin yá, jíin na jnūhun cúu jeē steén yā.

²⁰ Te ni cahān Jesús:

Níní ní cahān rī nuū chitú ñáyuu, ni cajini sōho ndihí ñayuu. Te níní ní steén rī jnūhun ini tācá vehe iī sinagoga jíin ini templo cáhnu nuū ndutútú ndivii jnáhan yó hebreo. Te tú ni ñin jnūhun ní cáhán sāhi rí. ²¹ ¿Te naun cájnūhun ró ruhū? Ca-jnūhun ñáyuu ní cajini sōho jnūhun ni cahān rī, te máá i cachi ndese ni cahān rī. Chi cájini i ndese ni cahān rī.

²² Te jeē ni cáhān Jesús súcuan, te ñn policia ndíto templo jeē índichi de yūcuán, ní cani-ni de nuū yā. Te ni cahān de jíin yá:

¿A súcuan cáhān rō jíin sūtū cujéhnu naún?

²³ Te ni cahān Jesús:

Núu ni cahān rī ñn jnūhun néé, cachi na jnūhun néé ní cahān rī. Te núu tu ní cáhān rī ñn jnūhun néé, ¿te naun cáni ró rúhū? achí yá.

²⁴ Yūcuán na te Anás, sūtū cujéhnu un, ní tají de ya, núhni yā cuahān yā nuū Caifás, tēe cúu máá sūtū cujéhnu ga.

Jeē ní cachi tucu Pedro jeē tu jíin de ya

(Mt. 26.71-75; Mr. 14.69-72; Lc. 22.58-62)

²⁵ Te níiní jeē súcuan cúu, te índichi-ni Pedro, násaā de yuñúhún. Te ni cacahān jíin de:

¿A násūú ñn tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu rī, achí de.

²⁶ Yūcuán na te ñn mozo sūtū cujéhnu, jnáhan tēe jeē ní jehnde Pedro sōho, ni cahān jíin de:

¿A násūu máá ró cúu jeē ní jito rī jíin de ini huerto?

²⁷ Te Pedro tu ní cáchi tucu de. Te ni cana-ni líhli.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yūcuán na te ni quendacoo de jíin Jesús vehe Caifás, cuango de jíin yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívī i ley i jeē cahān jeē ma quívī i ini vehe ñn ñayuu jeē násūú hebreo cúu. Chí núu súcuan te ma cúu cuxíni i vico pascua jeē cóo inga quívī ún. ²⁹ Yūcuán

na te ni quenda Pilato, tēe cúu gobernador, ni cahān de jíin i jíináhan i:

¿Na cuēchi cájicān rō siquī tēe yáha?

³⁰ Te ni cacahān i:

Núu jeē násūu tēe cúnéé cúu tēe yáha, te ma jnī ná de jeē quíndeca ná de nuū ni núú, áchí i.

³¹ Te ni cahān Pilato:

Cuángoo jíináhan rō, te sándaā rō siquī de jíin ley cánevāha máá rō.

Te ni cacahān ñayuu hebreo un:

Máá ná jeē cácuu ná ñáyuu hebreo, tú na permiso cánevāha ná jéé cáhni ná ni ñin ñayuu.

³² Súcuán ni cacahān i návāha squícu jnūhun jeē ní cachi Jesús jeē quívi ya ndaha tēe Roma te cahni de ya jicā cruz. ³³ Te ni ndīvi Pilato ini palacio, te ni cana de jeē na quíji Jesús. Te ni cajnūhún de ya:

¿A máá rō cúu Rey ñayuu hebreo naún?

³⁴ Te ni cahān Jesús jíin de:

¿A cájnūhun rō ruhū jeē súcuán jéni ni maá rō, chí jéé ní cacastūhun ñáyuu hebreo nuū rō?

³⁵ Te ni cahān Pilato:

¿Chí tēe hebreo cúu ri jeē cúni rī? Ñayuu nación máá rō jíin sūtū cácujuhnu ni cachihi róhó ndaha ri. ¿Na vé ni sáha rō núu súcuán? Achí de.

³⁶ Te ni cahān Jesús:

Nasūu jéé ndácu ri jniñu nájnūhun cándacu tāca rey ñayīvi yáha. Chi núu jeē ñáyuu ñayīvi ní casáha jeē cúu ri rey, yūcuán na te tēe cándiquīn ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu ñayīvi yáha cúu jeē ndácu ri jniñu vijna. Achí yá.

³⁷ Yūcuán na te ni cahān Pilato jíin yá:

¿Te á ñin rey cúu rō jéé súcuán?

Te ni cahān Jesús:

Rey cúu ri, nájnuhun cáhán rō. Ni quiji ri ni cacu ri ini ñayīvi yáha návāha nacani ri jnūhun ndaā. Te ndihi ñayuu cájetáhú jnūhun ndaā, cájini nahín i jnūhun cáhán rī. Achí yá.

³⁸ Te ni cahān Pilato:

¿Ndese cuni yō ndé ñn cúu máá jnūhun ndaā?

Jeē ní cundaā jeē cúu yā

(Mt. 27.15-31; Mr. 15.6-20; Lc. 23.13-25)

Te jeē ni cáhān de jnūhun yáha, te ni quenda tucu de nuū ñayuu hebreo. Te ni cahān de jín i:

Tú cuiti na cuēchi níhín rī siquī de. ³⁹ Te íyó costumbre maá ró jijnáhan ró jéē vico pascua te siaá rī ñn tēe íne vecāa nuū rō. ¿Te á tu cácuni rō jeē siaá rī Rey rō nuū rō? Achí de.

⁴⁰ Yūcuán na te ndivii i ni cacana jee tucu i:

Ma siaá ni tēe jíñá, chi Barrabás siaá ni, achí i.

Te tēe cuíhná cúu Barrabás.

19

¹ Yūcuán na te ni cahān Pilato jeē na jnī soldado Jesús, te caní de ya jín cuarta ññ. ² Te ni casáha de ñn corona iñu, ni cachuhun de xinī yā. Te ni cachuhun de ya ñn sahma cuehé ndíhí jéē cúu sahma rey. ³ Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

⁴ Yūcuán na te ni quenda Pilato inga jínu, te ni cahān de jín ñayuu:

Yáhá condēhe ró tava rī de, návāha na cúni rō jeē tú na cuēchi níhín rī siquī de.

⁵ Te ni quenda Jesús, ñúhun ya corona iñu jíin sahma cuehé ndíhí un. Te ni cahān Pilato jíin i:

Yáhá condēhe ró de jíináhan ró.

⁶ Te nuū ní cajito sutū cácujuhnu jíin táca policia nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najnñi máá ró de te cahni rō de. Chi ruhū, tú na cuēchi níhín rī síquī de.

⁷ Te ni cacahān ñayuu hebreo un:

Cáneváha ná ñn ley, te jeē síquí ley un cánuú jēē cúu de, chi sáha de máá de jeē Séhe Yaā Dios cúu de.

⁸ Te jeē ní jini sōho Pilato jnūhun yáha, te víhyá gā ni yūhú de. ⁹ Te ni ndivicoo tucu de ini palacio, te ni cajnūhún de Jesús:

¿Ndé nuū véji ró?

Te tu ní cáhán cuiti Jesús jíin de. ¹⁰ Yūcuán na te ni cahān de jíin yá:

¿Naun tu cáhán rō jeē cahán rī? ¿A tu jíin rō jeē ndiso jníñu ri jeē cáhni rī rohó jicā cruz, te suni ndiso jníñu ri jeē siaá rī rohó quíhín rō?

¹¹ Te ni cahān Jesús:

Núu tu ní sáha Yaā Dios jeē ndiso jníñu ró, te tú na vé cúu sáha ró síquī rī. Jeē yúcuán tēe jeē ní nacuāha ruhū ndaha ró, cuēchi xeēn gā condee síquī de vésú máá ró. Achí yá.

¹² Yūcuán na te nde hora un ndúcú ndéyí Pilato ndese siaá de ya. Te ñayuu hebreo chi cácana jee i:

Núu siaá ni tēe jíñā, te tu cúu ní amigo rey Roma jeē cujénu ndácu jniñu núu súcuan. Chi táca tēe jeē sáha de rey máá de, núu súcuan te cúu de enemigo síquī rey un. Achí i.

13 Te jeē ní jini sōho Pilato jnūhun yáha, te ni ndacu de jniñu jeē na quénda Jesús ini vehe quiiji ya. Te ni cucōo de silla nuū cúndaā jniñu, nuū máni máá yūū ni jecāva, te lugar un nání Gabata nuū yūhu hebreo. 14 Te cuacuu cahuxī uū, te jehíni quivī ún quejéé vico pascua. Te ni cahān Pilato jíin ñáyuu hebreo:

Yáha índichi maá rey rō.

15 Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jéē cata caa rī rey rō jicā cruz naún?

Te sutū cácujuhnu un ní cacahān de:

Tuá na inga rey cánevāha ná jíjnáhan ná, chi máá-ni rey Roma jeē cujéhu ndácu jniñu nuū ná.

16 Yūcuán na te Pilato ni nacuāha de ya nuū i jeē na cúu yā jicā cruz. Te ni cajni i ya cuango o jíin yá.

Jeē ní cacata caa de ya jicā cruz

(Mt. 27.32-44; Mr. 15.21-32; Lc. 23.26-43)

17 Te ni quenda Jesús, ndíso ya cruz yā, cuango de jíin yá ñn lugar nuū naní Yiquí Xíní, te nuū yūhu hebreo naní Gólgota. 18 Te yūcuan ní cacata caa de ya jicā cruz. Te suni ni cacata caa de uū tēe nuū uū gā cruz, ñn ñn de ñn lado yā, te máá Jesús mēhñú. 19 Te suni ni ndacu Pilato jniñu jeē na cóndee jnūhun xinī cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí. 20 Te cuehē ñayuu hebreo ni cacahu i jnūhun yáha, chi máá yajni yuñúú cúu nuū ní cacata caa de ya. Te jnūhun un yósó jíin yuhu hebreo jíin griego jíin

latín. ²¹ Te tāca sūtū cácujuhnu nuū ñáyuu hebreo, ni cacahān de jíin Pilato:

Ma tée ní jéē cúu de Rey ñáyuu hebreo, chi sa suhva tee ní jéē maá de ni cahān jeē cúu de Rey ñáyuu hebreo.

²² Te ni cahān Pilato:

Ma násama ri jeē jé ni ndacu ri jniñu ni jecondée.

²³ Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuūn parte, te ñin ñin parte ni cuu ñin ñin soldado un. Te suni ni caquihin de camisa yā. Te camisa un tu ní quícu, chí ni cunu ní. ²⁴ Te ni cacahān maá de:

Ma cáhnde yō, chí vāha ga na sáha yó sorteo, te na cóndēhe yó ndé ñin yó níñin, achí de.

Te súcuan ni squícu jnūhun yósó núū tútu ñi nde jenahán jéē cahān Jesús: Ni caquihin de sahma ri cuu maá de. Te ni casáha de sorteo siquī camisa rī. Achí. Súcuan ni casáha soldado un.

²⁵ Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala. ²⁶ Te ni jito Jesús nuū naná yā jíin núū tée scuáha jeē maní gā yā jíin, suni índichi de yūcuán. Te ni cahān yā jíin náná yā:

Nánā, nde vijna te maá de nucuññi de cuu de sēhe ní.

²⁷ Yūcuán na te ni cahān yā jíin tée scuáha ún:

Nde vijna te cuu ña nájñūhun náná rō, achí yá.

Te nde hora un ní cana de ña cuacondée ña vehe de condito de ña.

Jeē ni jíhī Jesús

(Mt. 27.45-56; Mr. 15.33-41; Lc. 23.44-49)

28 Yūcuán na te ni jini Jesús jeē jé ni jīnu tācá jniñu jeē cánuú ndoho ya. Te návāha squícu jnūhun cáhán tutu iī, te ni cahān yā:

Jíchí rī ndute, áchí yá.

29 Te yūcuan íin ñn tīndohō ñūhun chitú vinagre iyá. Te ni cachundaji de ñn cachī nuū vinagre un, te ni catee de xinī ñn ndaha yújnu hisopo, te ni catee de yuhu ya jeē cóho ya. 30 Te ná ni jihí ya vinagre un, te ni cahān yā:

Je ni jīnu, áchí yá.

Te ni cāyí-ni xinī yā, te ni jihī-ni ya.

Jeē ní cují soldado lanza xiin ya

31 Te ñnga quivī ún coo vico pascua. Te tēe hebreo tu cáconi de jeē cóndita caa ndīyí ún jicā cruz quivī ndétátú un. Chi quivī ndétátú jeē cúu vico pascua, iī ndasí gá vēsú tāca gá quivī ndétátú. Te ni cacahān de jín Pilato jeē na ndácu de jniñu jeē jnahnú sīhin tēe cándita caa, te na cújiyo de jicā cruz. 32 Te ni quecoo soldado, te ni cajehnū de sīhin ñn tēe jeē ndíta caa jín yá, te suni súcuan ñnga de. 33 Te nuū ní quecoo de nuū Jesús, te ni cajito de jeē jé ni jihí yā. Jeē yúcuán tu ní cájehnū de sīhin ya.

34 Te ñn soldado chí ni cují de lanza xiin ya, te ni cane-ni ññī jín ndute. 35 Te máá rí jeē tēe tutu yáha, ni jito rí jeē súcuan ni cuu, te nácani ndāā rī jnūhun ndese ni cuu. Te jíní rī jeē iyó ndāā jnūhun cáhán rī, návāha suni candíje máá ró jijnáhan ró. 36 Chi súcuan ni cuu návāha squícu jnūhun cáhán tutu iī: Ma cahnú de ni ñn yiquí ya, achí. 37 Te suni ñnga jnūhun cáhán tutu iī: ñn quivī te coto i nuū Yaā jeē ní cují i lanza, achí.

*Jeē ní quindūji Jesús**(Mt. 27.57-61; Mr. 15.42-47; Lc. 23.50-56)*

³⁸ Te ni cuu tāca jeē yáha. Te íyó ñn tēe ñuu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jnáhan de hebreo. Te ni cahān ndahú de jín Pilato jeē na cuáha jnūhun quihin de yiqui cúñu Jesús. Te ni jēhe Pilato jnūhun. Yūcuán na te cuahān José, ni snúu de yiqui cúñu Jesús. ³⁹ Te suni ni jinū Nicodemo, tēe ni quiji nuū Jesús ñn jecuáa. Te ndíso de nájnūhun ocō uxī kilo sūje uvuā jeē ní saca jnáhan jín yúcū áloe. ⁴⁰ Te ndindúú de ni caquihin de yiqui cúñu Jesús, te ni cachusúcún de jín tira sahma jeē ni quívī yucū jeē jeén asīn ún, nájnūhun íyó costumbre maá ñayuu hebreo jeē cáchindūji i ndīyī. ⁴¹ Te yajni nuū ni jīhī Jesús íyó ñn huerto. Te nuū huerto un ndéé ñn yaū jeē ní caan jeé jicā ñn cava, nuū ná tu quindūji ndīyī. ⁴² Te yūcuan ní cachindūji de Jesús, chi íne yajni yaū ndīyī ún. Chi je yajni quejéé quívī ndétātú de jeē cácuu de ñayuu hebreo, te tú na ley chindūji de ndīyī núu je ní quejéé quívī ún.

*Jeē ní natecu Jesús**(Mt. 28.1-10; Mr. 16.1-8; Lc. 24.1-12)***20**

¹ Te jenéhen quívī domingo ni jinū María ñuu Magdala nuū ní yīndūji Jesús, te yínee gā cúu. Te ni jito ña jeē ní cujiyo yuū ndihyú yuyáú ndīyī. ² Yūcuán na te jínu ña cuahān ña nuū Simón Pedro jín núu ñga tēe scuáha ún jeē maní gā Jesús jín. Te ni cahān ña jín de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

³ Te ni quendacoo Pedro jíin inga tēe scuáha ún, cuácondēhé de yaū ndīyi. ⁴ Te cájину tayí ndindúú de. Te inga tēe scuáha ún, nīhin ga ni jinu de vēsú Pedro. Te xīhna gā de ni jinū yaū ndīyi. ⁵ Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quívi de. ⁶ Te sáá te ni jinū Simón Pedro jeē ndiquín jnáhan de vēji de jíin inga tēe ún. Te ni quívi de nuū ní yindūji Jesús. Te suni ni jito de jeē tira sahma cáyūcu máá na. ⁷ Te ni jito de sahma jeē ni ñúsúcún xīnī Jesús, tu cátú jíin tira sahma, chi ni natuu te cátú sīn. ⁸ Yūcuán na te suni ni quívi inga tēe scuáha jeē ni jínū xīhna gā nuū ní yindūji ya. Te ni jito de ndese íyó, te ni candíje de jeē ní natecu yā. ⁹ Chi nde ná tu jinūcoo de yaū ndīyi, te tu ní jécūhun ni de jnūhun cáhán tutu iī, jeē jini ñúhún natecu yā núu je ni jihī yā. ¹⁰ Yūcuán na te ndindúú tēe cáscuáha ún cuanungoo de vehe de.

*Jeē ní nane ya nuū María ñuu Magdala
(Mr. 16.9-11)*

¹¹ Te María índichi ña ndáhyú ña nuū ní yindūji ya. Te níní ndáhyú ña, te ni scáyí ña máá ña, ni jito nihni ña ini yaū ún. ¹² Te ni jito ña uū ndajéhé andiví, cáñuhun ya sahma cuijín. Te ñn ya néne ichi xíní, te inga ya néne ichi núu jehé nuū ni cátu yiqui cúñu Jesús. ¹³ Te ni cacahān yā jíin ña:

¿Najehē ndahyú rō?

Te ni cahān ña:

Ni catava de Jitoho ná, te tu jíní na ndé nuū ní cachune de ya.

14 Te jeē ni cáhān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nácuni ña jeē maá yá cúu. 15 Te ni cahān yā jíin ña:

¿Najehē ndahyú rō? ¿Ndé ñn nánducú ró? achí yá.

Te maá ña jéni ni ña jeē téé ndíto huerto cúu ya. Te ni cahān ña jíin yá:

Núu maá ní ni quenehen ní yá, te cachi ní ndé nuū ni jéchune ní yá, te na quínuquihin ná yá, achí ña.

16 Te ni cahān Jesús jíin ña:

María, achí yá.

Te jeē ni cáhān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jnūhun un cúni cahān, Maestro.

17 Te ni cahān Jesús jíin ña:

Ma quehé ró rúhū, chi ná tu ndaa ri quinhun rī nuū Tatá rī. Te cuáhán núu tācá hermano rī, téé ni cascuáha jíin rí, te cachi rō nuū de jeē ndaa ri quinhun rī nuū Tatá rī, jeē suni Tatá maá ró jijnáhan ró cúu. Te cúu ya Yaā Dios maá rí jíin Yaā Dios maá ró jijnáhan ró. Achí yá.

18 Yūcuán na te María ñuu Magdala un, cuáhān ña, te ni castūhún ña nuū téé cáscuáha un jéé ní jito ña nuū maá Jítóho yō jíin jéé ni cáhān yā jnūhun yáha jíin ña.

Jeē ní nane ya nuū téé cáscuáha jíin yá

(Mt. 28.16-20; Mr. 16.14-18; Lc. 24.36-49)

19 Te jeē ní cuaa maá quívī domingo un, te cáhān tútú téé cáscuáha ún ini ñn vehe. Te cándihyū yehyí, chi cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsú ndihyú yehyí, te ni cahān yā jíin de:

Ndeyí s̄h̄i coo ni rō jijnáhan ró, áchí yá.

²⁰ Te ná ni cahān yā súcuan, te ni steén yā ndaha ya jín xiin ya nuū de. Te ni cacus̄h̄i ni tēe cáscuáha un jēe ní cajito de nuū maá Jítóho yō. ²¹ Yūcuán na te ni cahān tucu Jesús:

Ndeyí s̄h̄i coo ni rō jijnáhan ró. Te nájnūhun ni tají Tátá rī ruhū ini ñayiví, suni súcuan tají rí rohó nacani ró jnūhun ri nuū ñáyuu. Achí yá.

²² Yūcuán na te ni tīv̄i tachī yā nuū de jijnáhan de. Te ni cahān yā:

Vijna te ni canihīn rō Espíritu Santo. ²³ Te tāca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

Jeē ní nane ya nuū Tomás

²⁴ Te Tomás, tēe ni cacu cuátí, ñn jnáhan jeē uxí uū tēe cáscuáha jín yá, tu ní íne de quiv̄i jeē ní nane Jesús nuū tāca gá tēe cáscuáha. ²⁵ Yūcuán na te sava ga tēe cáscuáha un, ní cacahān de jín Tomás:

Ni cajito ri nuū maá Jítóho yō.

Te ni cahān Tomás:

Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiti rī, achí de.

²⁶ Te nuū uná quiv̄i, te tēe cáscuáha un cáhīn tútú tucu de ini ñn vehe. Te íne Tomás jín de. Yūcuán na te ni quee-ni tucu Jesús, ni jecuññi yā mēhñú de, vēsú cándihyū yehyí. Te ni cahān yā jín de:

Ndeyí s̄h̄i coo ni rō jijnáhan ró.

²⁷ Te ni cahān-ni ya jín Tomás:

Chune xinī ndáha ró ini ndaha ri yāhá te coto ró. Te scáá ndaha ró, te chune ró xiin ri nuū ni tújī. Te ma cáni siquí gá ni rō, chi sa suhva na cándíje ró.

²⁸ Yūcuán na te ni cahān Tomás jíin yá:

Aī, Jitoho maá ná jíin Yaā Dios maá ná cúu ní, áchí de.

²⁹ Te ni cahān Jesús jíin de:

Tomás, nde ni jito ró núū rī, te ni candíje ró. Te yōhyo ndetū tāca ñáyuū jeē candíje ruhū vēsú tu ní jíto i nuū rī, achí yá.

Najehē ni tee Juan libro yáha

³⁰ Te suni ni sáha Jesús cuehē gā jniñu jéhnū jeē ni stéén yā poder yā nuū téé cáscuáha jíin yá, jeē tu yósó núū tútu yáha. ³¹ Te tācá jniñu yáha ní tee ri návāha candíje ró jijnáhan ró jéé Jesús cúu Cristo, maá Séhe Yaā Dios. Chi jeē candíje ró yá, te cotecu rō ní cáni sáha ya.

Jeē ní nane ya nuū uxá tēe cáscuáha jíin yá

21

¹ Te ni cuu jecu quívī, te inga jíinu ni nane Jesús nuū téé cáscuáha jíin yá, jeē cáhīn de yumar Tiberias. Te suhva ni steén yā maá yá nuū de:

² Cáhīn tútú Simón Pedro, jíin Tomás, tēe ni cacu cuatí, jíin Natanael, tēe ñuu Caná ndañūū Galilea, jíin ndíndúú séhe Zebedeo, jíin úū gā tēe cáscuáha.

³ Te ni cahān Simón Pedro jíin de jijnáhan de:

Quíjnī ri chācá.

Te ni cacahān de:

Suni quingoo ri jíin ró.

Te cuangoo de, te ni quívīcoo de in barco. Te tu ní cáhīn cuítī de tí jecuáā yúcuan. ⁴ Te jeē

cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu. ⁵ Yūcuán na te ni cahān yā jíin de:

Aá rō jijnáhan ró, ¿á ní canihīn rō chācá caji yō?

Te ni cacahān de:

Tú cuiṭi, achí de.

⁶ Yūcuán na te ni cahān yā jíin de:

Síngava ñunu ró ichi lado váha barco, te nihīn rō tī.

Te ni casíngava de ñunu, te tuá ní cúu cuiṭi natava de, jeē ni quívicoo cuehē ndasí cháca. ⁷ Yūcuán na te tēe scuáha jeē maní gā Jesús jíin, ní cahān de jíin Pedro:

Máá Jítóho yō cúu, achí de.

Te jeē ní jini sōho Simón Pedro jeē maá Jítóho yō cúu, te ni nachuhun de sahma de, chi ni tava de jeē sájniñu de. Te ni ndava-ni de nuū mar cuahān de nuū yā. ⁸ Te tāca gá tēe cáscuáha ún, vendicoo de jíin barco yundúte, cástaa de ñunu ñúhun chitú cháca. Chi tu jíca cáhīn de jíin ñuhun íchi, chi nájnūhun ciento-ni metro cúu. ⁹ Te nuū ní quendacoo de ini barco, te ni cajito de jeē nduhvá tīcua ñuhūn, te íne staā jíin ñn chācá chíhyó. ¹⁰ Te ni cahān Jesús jíin de:

Cuáquihin jecu chācá jēe sa ní cajññ ró, na táu yó, achí yá.

¹¹ Te ni quívi Simón Pedro ini barco, te ni staa de ñunu, ni quee de jíin ndé nuū ñúhun íchi. Te ñúhun chitú cháca náhnu, ñn ciento uū xico uxī unī tī cúu. Te vēsú ñn súcuan tī ñúhun, te tu ní táhndé ñunu.

¹² Te ni cahān Jesús jíin de:

Nehen jijnáhan ró na cási ni yō.

Te ni ñn tēe cáscuáha ún tu ní cúndeyí ni de cajnūhún de ya núu ndé ñn cúu ya. Chi je cájini de jeē maá Jítóho yō cúu ya. ¹³ Te ni quindēhe Jesús yuñúhún, te ni quihin ya staā ún, te ni jēhe ya nuū de, te suni súcuan chācá un.

¹⁴ Yāha cúu vuelta unī jeē ní nane Jesús nuū tée cáscuáha jíin yá, ná ni natecu yā.

Jeē ní ndajnūhún Jesús jíin Simón Pedro

¹⁵ Te nuū ní cuu ni cajesi ni de, te Jesús ni cajnūhun yá Simón Pedro:

Simón sēhe Jonás, ¿á mánī gā rō jíin rí vēsú tāca gá tēe yáha?

Te ni cahān de:

Je jíiní ni jēē maní na jíin ní, achí de.

Te ni cahān yā jíin de:

Núu súcuan te stéén rō jnūhun ri nuū ñáyuu cácuu nájnūhun londe ri.

¹⁶ Te ni cajnūhun yá de vuelta uū:

Simón sēhe Jonás, ¿á mánī rō jíin rí?

Te ni cahān de jíin yá:

Je jíiní ni jēē maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuan.

¹⁷ Te ni cajnūhún tucu ya de vuelta unī:

Simón sēhe Jonás, ¿á mánī rō jíin rí?

Te ni cucuíhyá ni Pedro jeē ní cajnūhun yá de vuelta unī núu maní de jíin yá. Te ni cahān de:

Máá ní jíiní ni ndihí, te jíiní ni jēē maní na jíin ní.

Te ni cahān yā:

Núu súcuan te stéén rō jnūhun ri nuū ñáyuu cácuu nájnūhun lanchi ri. ¹⁸ Te jendaá cahán rī jíin ró jeē

nde ná suchí ró, te ni quihin máá ró sahma ró, te ni jica ró ndé nuū cuní maá ró. Te núu na yí ró, te nasūu jéē cuní maá ró, chi inga ñayuu quindēca i rōhó nuū tu cuní rō quihīn rō. Te scáá rō ndindúú ndaha ró jéē cuu rō.

¹⁹ Jnūhun yáha ní cahān yā jeē ni stéén yā jeē cóndita caa de jicā cruz cuu de, te jeē súcuan cuatáhú de cúu jeē steén de jeē yóhyo cújénu Yaā Dios. Yūcuán na te ni cahān gā yā:

Condiquīn rō ruhū jeē sáha ró jniñu ní ndacu ri nuū rō, achí yá.

Jnūhun tēe scuáha jeē maní gā yā jín

²⁰ Te ni ndió cóto Pedro, te ni jito de tēe scuáha jeē maní gā Jesús jín, ndíquín de vēji de yatā. Tēe un cúu jeē ní conene xiin Jesús ná ni cacuxíni de jíin yá, te ni cajnūhún de ya: ¿Ndé ñn de cúu jeē nastúu níhín? ²¹ Te jeē ní jito Pedro nuū téé ún, te ni cajnūhún de Jesús:

Te tēe yáha, ¿ndese coo jíin de?

²² Te ni cahān Jesús:

Núu cuní rī jeē cótecu de nde quivī ndíji ri, ¿te naun ndíhví ni rō? Máá ró chi condiquīn rō ruhū jeē sáha ró jniñu ní ndacu ri nuū rō, achí yá.

²³ Yūcuán na te jnūhun yáha ní jitē núu nuū tācá hermano, jeē tée scuáha un má cúu de. Te tu ní cáhán Jesús jeē ma cúu de, chi sa suhva ni cahān yā: Núu cuní rī jeē cótecu de nde quivī ndíji ri, ¿te naun ndíhví ni rō?

²⁴ Te tēe scuáha un jéē maní gā Jesús jín, suu cúu ruhū jeē nácani jnūhun tācá jniñu yáha, te suu ri téé tāca jnúhun yáha. Te cájini rō jijnáhan ró jéé iyó ndáá jnūhun nácani ri.

²⁵ Te suni íyó cuéhē ndasí gá jniñu ní sáha Jesús.
Te núu tee yó ná ìn ná ìn, te ma cánda níí ñáyíví
cuhun tutu jeē cóso jnūhun ún, jéni ni rī. Te ni cuu.
Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9665e546-39d0-5bd5-8b10-38916a94951f